


宋學士全集

一〇



宋士全集

(十)



宋濂撰

宋學士全集卷之十七

碑

敕賜銀青榮祿大夫上柱國中書平章軍國重事兼太子少保鄂國常公贈翊運推誠宣德靖遠功臣開府儀同三司上柱國太保中書右丞相追封開平王謚忠武神道碑銘有序

洪武二年己酉秋七月七日銀青榮祿大夫上柱國中書平章軍國重事兼太子少保鄂國常公薨於軍中二十三日訃聞皇帝爲之震悼罷朝在廷之臣莫不灑泣越明日詔中書定議贈翊運推誠宣德靖遠功臣開府儀同三司上柱國太保中書右丞相追封開平王謚曰忠武八月朔日柩車至龍江上往臨奠慟哭而還親爲擇地於鍾山草堂之原營建宅兆及棲靈之祠凡百須之具一給于官不以煩其家至冬十月九日始葬復推恩及其三代皆爲王爵生榮死哀可謂至矣上猶念其功不置召臣濂於庭而謂之曰朕東撫高麗西抵吐蕃北際沙漠南來交趾占城莫不稽首奉命計其開拓之功以十分而言王蓋居其七八朕今手錄戰伐次第以授爾尙爲文勒諸豐碑以著王之功於無窮焉臣濂受詔而退謹再拜序而銘諸幽王諱遇春姓常氏濠州懷遠人世爲農家賦性剛毅膂力絕人歲壬辰羣雄並起江淮爲之鼎沸時王年二十有三爲羣盜劉聚所得聚覩王狀貌奇偉拔於行伍而信任之王每出戰必鼓勇爭先聚深喜之王察聚所爲終不能有成欲擇所依乙未聞上駐兵和州領衆數十人乘聚來歸居兩月餘請爲

前部先鋒上曰爾之來者爲士卒糧絕故就食耳爾自有主我安得而留之王請之再三至於涕泣上曰爾姑從吾渡江俟克太平委身事吾未晚也夏六月上先抵采石磯元兵陣於磯上而磯下巨舟如織相距僅三丈餘猝難登岸王乘快舸相繼而至上麾之使前王卽捨舟挺戈先登衆皆披靡遂拔采石乘勝取太平從上守禦乃始授總管府先鋒冬十月陞管軍總管丙申春二月元中丞蠻子海牙復以兵屯采石南北不通上慮將士雖渡江而其父母妻孥尙留淮西勢莫可致命王統兵攻之王至設疑兵以分其勢而以正兵與之合及戰別出奇兵擣敗之悉俘其精銳自是元兵扼江之勢衰矣尋守溧陽攻建康功爲諸將先三月從今大將軍右丞相徐公達克鎮江夏四月授承信校尉領軍先鋒秋九月再攻常州會青軍叛去與僞吳張士誠合徐公被圍于牛塘王與諸將力戰大敗其衆擒士誠梟將張將軍冬十有一月除統軍大元帥丁酉春擢江南行中書省都督馬步水軍大元帥夏四月從徐公下寧國秋八月克馬馱沙冬月取池州戊戌春擢江南行中書省都督馬步水軍大元帥冬十有二月上親取婺州己亥夏四月轉鎮國上將軍同僉書江南等處行樞密院事守婺城尋命攻衢州降之冬十月陞僉院十有二月攻杭州庚子夏五月召還京師從徐公拔安慶趙普勝之水寨時僞漢陳友諒揚言援安慶王策其必攻池州以羸弱守城伏銳士於九華山明日友諒兵果來攻城伏兵四合俘殺萬餘人六月友諒入太平犯龍灣王共謀擊敗之已而上整舟師襲友諒留王守京師軍民無敢譁辛丑春三月拜江南行中書省參知政事秋七月從上取安慶破江州回守龍灣冬十有一月張士誠出兵寇長興上時駐九江聞報還京師命王往

援士誠兵敗，俘殺五千餘人。壬寅春修安慶城。羅友賢構亂，據池州神山寨。將與士誠通杭歙震動。冬王往攻之。癸卯春正月擒斬羅友賢。餘黨悉平。三月張士誠遣兵圍劉福通于安豐。王從上擊之。將戰。王突入其陣。三戰三勝。敵兵大敗而去。俘獲士馬無算。遂同徐公闡廬州。凡三月城將下。適陳友諒攻南昌。王解圍而還。秋七月從上率諸將往援。八月遇友諒于彭蠡湖之康郎山。王與之聯舟大戰。呼聲動天地。無不一當百。縱火焚僞平章舟。風急火熾。十里之間。湖水盡赤。敵將張定邊素號梟猛。奮前迎戰。王射之。定邊中矢走。友諒乃退保鞋山。諸將以友諒兵尙強。請縱其去。王獨不言。及我師出湖口。皆言江流湍急。欲放舟而下。上知其情。命以舟扼上流。王應之。諸將乃逆流而上。舟蔽江面。控湖口者旬有五日。友諒軍食乏。出江求戰。王遣火舟火筏禦之。敵兵奔潰。追北數十里。與之酣戰。自辰至未。不解。上所乘舟及王舟皆膠於沙。王旣脫御舟。而已舟被圍。復力戰而脫。于是友諒中流矢死。士卒十萬皆降。未幾。其臣立友諒之子理于武昌。冬十月王帥師討之。四面合圍。甲辰春二月理衡璧出降荆湖之地。望風皆附。陞中書平章政事。秋七月從徐公取廬州。八月遂自將兵平臨江之沙坑麻嶺十洞牛陂諸寨。進取贛州。乙巳春正月克之。悉定南安。南雄韶州。夏五月還兵取安陸襄陽。冬十月從徐公克泰州。丙午春三月復從克高郵。夏四月淮安濠泗徐宿安豐皆下。秋八月諸將攻浙西。師次太湖。僞萬戶尹義等逆戰。王擒之。直趨湖州之毗山。與敵兵水陸屢戰。敵兵大潰。遂抵城下。塞其四門。晝夜環攻之。僞丞相張士信悉發境中兵爲援。屯于舊館。出我師之背。王統奇兵由大全港入結營東阡。復出敵背。且填壅溝港。絕其歸路。士誠知事急出。

親兵拒鬪。王一鼓勝之。士誠復遣其將徐義統赤龍船親軍來援。王復擊敗于烏鎮。冬十月。舊館降。得兵六萬。十有一月。湖州亦下。遂進圍平江。丁未。圍之益急。士誠收合餘燼。猶背城百戰。降其將士且盡。秋九月。始克之。縛士誠來獻。籍其兵二十有五萬。乃加授中書平章軍國重事。疏封鄂國。進爵上公。冬十月。復授征討副將軍。同徐公奉命北伐。戊申。春正月。上卽皇帝位。立國建號。改元洪武。王與徐公下山東諸郡。遂攻汴梁。守臣李景昌遁。進攻河南。敵兵五萬屯于洛水之北。將出迎戰。王布陣既定。單騎執弓矢衝入其隊。敵發二十騎攢槊刺王。王一箭中其前鋒。大呼殺入。悉獲其衆。而河南諸城先後皆平。上幸汴京。謀取燕都。秋七月。徐公與王渡大河。河北諸郡又平。八月二日。燕都不戰而克。元君北奔。師次太原。其守將擴廓帖木兒帥衆來禦。其鋒銳甚。王與徐公謀曰。我騎兵雖集。而步卒未至。何以能戰。莫若遣精騎夜劫其營。其衆可亂。衆亂。主將可縛也。徐公如王言。擴廓帖木兒果中傷而遁。己酉。春正月。進攻大同。竹貞棄城走。河東又平。遂西入秦。張良弼遁。李思齊迎降。奉元鳳翔鞏昌臨洮又平。夏五月。元將也速兵侵通州。有旨命王以所部軍東還拒之。遂擣永平。過惠州。獲江文清士馬以千計。至大寧。也速遁。破開平。元君又北奔。追至北河。俘其宗王三人及平章鼎住等。凡得軍士萬人。車萬兩。馬三千。牛五萬。全師還燕。次柳河。川。得疾而薨。享年僅四十爾。王之爲人。守謙而不矜。有功而無過。運籌決勝之方。不學而能。其從大將軍東征西伐。而能遵守節制。及其自將兵。則所至無不克捷。由其智識明而材力雄。故施之各得其宜。嗚呼。若王者。可謂開國之殊勳者矣。王之曾太父四三府君。累贈銀青榮祿大夫柱國中書平章政事。追封開

平王謚莊簡妣張氏追封開平王夫人。大父重五府君累贈儀同三司上柱國少保中書平章政事追封開平王。謚安穆妣陳氏追封開平王夫人。父六六府君累贈開封儀同三司上柱國太保中書右丞相追封開平王。謚靖懿妣高氏追封開平王夫人。妻定遠藍氏封開平王夫人。子男三人曰茂曰昇曰森皆上所賜名女三人長許爲皇太子妃餘皆幼臣濂聞之昔日唐太宗起義兵而定天下當時有尉遲恭者乘劉武周仗劍來從其後輔成唐業而恭之功爲多於是生有鄂國之封歿有忠武之謚今王之功非恭所可及上之所以遇王者封謚與之雖同而其王爵之加恩數優渥揆之於唐誠又過之史臣所謂君臣相遇千載一時者豈不異世而同符也哉是宜銘諸貞石傳之千萬世一以昭聖天子垂念功臣如此之至一以著王之勳烈於不朽云爾銘曰

聖皇開天豪傑四從龍興而雲虎嘯而風義旗所指山嶽震動飈馳霆春孰不神竦維忠武王其氣至剛杖劍來從飛渡大江無堅不摧無敵不碎席卷長驅易如拾芥平吳定越帖荆撫淮威聲所加小大畢來齊魯旣寧汴洛亦定直指幽燕不戰而勝元君遠逝六軍倒戈本根旣撥何有條柯乃收晉冀乃清秦隴乃徇遼海人百其勇茫茫朔漠灤河所經誓將剗滌邊塵弗驚王之忠精上貫天日煜其有光亘古不沒幅員之廣漢唐莫過馬蹄所及王功爲多十五年間百戰百捷備殲勤勞光輔帝業翊運之勳靖遠之威在古或罕於今見之大功垂成王忽長逝當寧興哀如失一臂爰加恩寵用錫玉封袞衣繡裳照耀泉宮天子曰噫未慊朕志其推爾爵上褒三世死生哀榮孰可比焉王雖云歿生氣凜然鍾山之陰隧道有石

詞臣勒銘垂示千億。

敕賜榮祿大夫同知大都督府事兼太子右率府使贈推忠翊運宣力懷遠功臣光祿大夫湖廣等處行中書省平章政事柱國追封蘄國公謚武義康公神道碑銘有序

皇帝卽位之三載混一華夏聲教所被罔間遐邇梯山航海奉贊獻琛上念熊羆之士不二心之臣東征西伐宣勞有年方將胙土分茅以定功賞而都督康公薨於陝州上聞之嗟悼不已旣敕有司穿土作室以寧體魄復欲昭其功勳於悠久詔翰林學士臣宋濂稽諸簡牘所書文於堅石以垂示於億萬載臣濂謹按公諱茂才字壽卿康其姓也世爲蘄州人曾祖文廣皇贈中奉大夫中書參知政事護國追封京兆郡公祖德懋皇贈資善大夫中書右丞上護軍追封京兆郡公父壽皇贈榮祿大夫同知大都督府事柱國追封蘄國公母蕭氏追封蘄國夫人公當元之季四方雲擾未幾蘄州陷公結義旅以捍蔽爲務授以長官俄遷爲鎮府同諸將復九江擣蘄水黃連寨轉蘄州路同知總管府事屯戍和之裕溪太平之采石使者考其功狀陞淮西宣慰副使同知元帥府事又陞宣慰使都元帥歲乙未六月上帥師渡江將士家屬尙留於和州上慮公扼采石之衝弗獲渡時出兵挑戰公兵雖寡而以寬弘得士卒心故臨陣人多效死於是數戰不克後數月常忠武王遇春遣遊兵虛撓之公連日發軍以應王度其力疲夜設伏兵質明殲其精銳殆盡然猶收合潰散堅寨於天寧洲明年二月上命諸將以襄陽大砲破其寨公奔行臺便宜陞淮南行省參知政事甫踰月上亦克金陵又奔京口舟師追及之公度天命有歸乃率所部餘兵三千

解甲來附免冠頓首言前日戰各爲其主今日屢敗天數也事至於此死生唯命苟得生全尙竭犬馬之力以圖報效上笑而釋之仍許統所部兵從征又明年授秦淮翼水軍元帥守禦龍灣取江陰之馬馱沙八月僞吳張士誠犯我疆境公驅兵逐之獲其樓船上賜名馬一疋黃金一錠歲戊戌從廖楚公永安攻池州取趙雙刀之樞陽遷都水營田使兼帳前總制親兵左副指揮使明年八月攻皖城僞將率樓船出戰公復獲之又明年六月僞漢陳友諒傾國入寇攻陷我姑孰殺戮我吏民意將窺我南京上召公謂曰爾不疑我乎公復頓首謝上曰汝旣不相疑宜作書遣使僞降友諒爲內應招之速來仍給告以虛實使分兵三道以弱其勢友諒果如所言暨至諸將同公奮擊大破之縛其士卒二萬有幣帛白金之賜歲辛丑八月上怒友諒來寇率將士親征公領舟師行擊安慶破江州僞都友諒西遁遂下蘄州興國漢陽公沿流而下克黃梅某家寨十一月取江之瑞昌敗友諒八陣指揮友諒之勢遂衰遷帳前親兵副都指揮使明年九月復龍興又明年攻左君弼於廬州四月友諒圍龍興上親往援公與諸將皆從友諒聞上至亟解圍還七月大戰於彭蠡湖軍聲嘯呼湖水爲之起立浮屍蠢動至數十里友諒遂至敗亡又有幣帛之賜十月上親征武昌公從之歲甲辰二月下之友諒之子理銜璧出降三月進金吾侍衛親軍都護府副都護四月從大將軍徐公達淳攻廬州七月下之八月拔安豐繼取江陵及湖南諸州加賜幣帛明年二月改神武衛指揮使五月進大都督府副使閏十月士誠兵犯江陰京口上帥大軍水陸並進公在行中及至鎮江士誠兵已遁又明年正月追至巫子門擊敗其衆獲士卒三千公功爲尤多四月搗淮安

之馬遷港拔其水寨復獲士卒與艨艟無算淮安平七月遂攻湖州十一月破之進逼姑蘇姑蘇士誠僞都卽遣銳卒來迎鬪大戰尹山橋公持戟督戰益力銳卒盡覆乃進圍齊門刀劍林立飛鳥不敢下大將軍命諸將合攻之吳元年九月姑蘇平公取無錫州十月陞同知大都督府事兼太子右率府使進階榮祿大夫洪武元年上以江南之地旣入版圖乃遣大將軍經略中原公從定齊魯之地復由黃河取汴梁下洛陽駐師陝州規運餉造浮橋以渡大軍鎮河中善撫綏遺民爲之立石頌德絳解二州則公所招徠蔽遮潼關秦人不敢東向二年復從大將軍征漢中奉詔還軍中道因疾而薨實八月之三日也年五十有七上下羣臣議贈公推忠翊運宣力懷遠功臣光祿大夫湖廣等處行中書省平章政事柱國追封蘄國公謚曰武義卜以九月二十一日葬於應天府上元縣鍾山鄉之幕府山上親臨奠而百司繼之祭幄相望聯絡原野時人以爲榮公娶方氏追封蘄國夫人繼室田氏封蘄國夫人側室朱氏余氏子男三人鐸田氏出鑑朱氏出鎮余氏出公通經史大義事太夫人以孝聞輕財仗義意氣磊落而尤有志於事功值元祚將終其才弗克盡施然而眞主龍飛於羣雄之中公卽能識之卷甲韜戈率衆臣附坦然而不惑可謂上知天命下體人心者矣由是昭被寵眷倚之以心膂用之爲爪牙十餘年間屢從征討茂績奇勳著稱當世存則安富尊榮加以爵位薨則疏封賜謚貢及九泉令名垂於竹帛重祿延於子孫公其可以不朽矣臣濂謹拜手稽首述辭於碑系之以銘深懼不足以稱上報功之意銘曰

於赫聖明受命於天如日之升照於八埏其一於時康公江險之恃大軍西來視如平地其二巨礮轟雷物莫

敢擣何戰弗潰何守弗傾三天人攸歸勢何敢抗知幾先來率衆內嚮四皇帝曰嘻有附匪疏予開誠心遇爾不疑五爾礪矛鋌爾部士卒助予四方以寧萬國其六公拜稽首賜死爲生誓殫報効如無餘齡七孰不爲庭率師往討矯如翼如風馳電掃八東吳西楚蹴陳駕張身經百戰兕豎始亡九大將北伐同取汴洛出鎮於蒲恤其孤弱十蔽遮河潼以義爲關誰敢操戈睥睨其間十一介龜負碑以頸遺愛民亦何心恩義斯在十二從伐漢中迢迢西征有命班師中道而薨十三帝念將臣血戰之苦將酬其勳錫以茅土其十四孰不壽考以樂承平公胡嬰疾隕魄泉局十五帝情憫悼恩命絡繹穿山爲堂畢茲窀穸十六名垂於史祿延於家翩然而逝公復何嗟十七史臣造文大書深刻以昭公勳有永無極十八

敕賜故懷遠大將軍僉江南等處行樞密院事贈榮祿大夫江西等處行中書省平章政事上柱國追封梁國公趙公神道碑銘有序

故懷遠大將軍僉江南等處行樞密院事趙公之薨距今已十寒暑褒卹雖頽而墓隧之碑未樹其子懷遠將軍同知金吾右衛親軍指揮使司事獻請於大都督府移文中書中書下其事禮部於是尙書臣凱侍郎臣魯具以事聞上可其奏詔臣濂撰文而臣某書篆以賜之臣濂等受命震惕深懼不足以稱上意退考諸功狀而序之曰公初諱某今改賜德勝姓趙氏濬之鍾離人曾大父小乙府君妣時氏大父省二府君妣王氏父諱仁贈懷遠大將軍同知指揮使司事輕車都尉追封天水郡侯妣李氏封天水郡夫人公世爲良農家狀貌魁偉有膂力尤能馬上運槊捷疾如飛人不敢猝近歲壬辰江淮倅擾州縣簡拔梟

銳爲義兵。奇公勇悍。選爲羣隊長。公年甫二十有八。帥衆接戰。必操蝥弧以爭先。蹈湯赴火。有不暇卽敵人望而畏之。然棲棲在下列。無有旌其能功者。乃走西營。謁歸德王忙哥。隸麾下。稍久。察其馭軍無律絕。類兒戲。又欲擇豪傑而依之。悵惱未有所歸。歲甲午。我朝皇帝統領大將南征。駐軍滁陽。公聞母夫人在軍中。秋七月戊寅。遂棄其妻來從。及見上轅門。喜獲騎將。遂賜以今名。命爲帳前先鋒。已而從上取鐵佛岡。攻三汊河口。破張家寨。克全椒後河。六丈大樹諸寨。尋出師援六合。左股爲流矢所中。幾至危殆。上親臨視焉。歲乙未之春。閏正月。刻鷄籠山。羣盜與僞將韓溥酣戰。直搗烏江下和州。而舍山次第平。三月夜襲陳也。先營戊申也。先來侵。力出鬪卻之。夏四月庚申。拔板門寨。五月。擊長官寨。遂取儀真。上錄公從戰之功。超授忠勇校尉。管軍總管府先鋒。六月丙辰。復從上渡大江。時元兵屯牛渚。劍槊如林。常忠武王鼓勇先登。而奪其營。諸將乃下太平。連攻蕪湖。句容。取之。秋七月辛卯。克溧水。八月。破溧陽。公皆有功。歲丙申春二月。元將蠻子海牙闕大兵南渡。擁兵建柵於采石磯。以斷淮西之路。時將士家屬皆留淮西。上慮其心動。淳命忠武王帥師攻之。公亦在遣中。乃以疑兵分其勢。然後出正兵與戰。短戈方接。奇兵遽起。而乘之。元將大敗而遁。三月乙酉。大破陳也。先營於方山。庚寅。下金陵。公之績爲諸將先。丁酉。上命徐魏公取鎮江。公副之。破苗縝軍水寨。夏四月。下丹陽。金壇。五月。平宣城。兵鋒所及。勢如破竹。而所向無前矣。轉承信校尉。領軍先鋒。六月。取廣德。秋七月。破僞吳張士誠水寨。九月。復從忠武王攻毗陵。會清軍叛。與士誠合圍魏公於牛塘。王與公大敗其衆。擒其梟將張將軍。歲丁酉春三月壬午。取毗陵。時豪傑雄爭。而民

心無定向。曾未幾何。廣德宣城叛。公復取之。夏六月戊辰。取江陰。秋七月丙子。攻常熟。張士德出挑戰。公麾兵而進。士德就縛。士德。士誠之弟也。遂征甘露、望亭。無錫諸寨。歲戊戌春二月。公從大將攻湖州。已而宜興叛。秋七月。公復取之。歲己亥夏四月。擢懷遠大將軍中奕左副元帥。五月。攻池州。取青陽、石埭。當是時。安慶實爲荆楚咽喉之地。勢不得不取。秋八月。公攻之。已而取無爲。潛山。冬十有二月。復從大將征杭州。歲庚子春三月。還南京。會僞將朱暹來攻宜興。公帥師爲援。卽搗退之。夏五月。僞漢主陳友諒以重兵襲我太平境。直犯龍江。皇上震怒。命諸大將分據險要。授以成算。而命公守虎口城。虎口城。龍江第一關也。旣而友諒兵大至。兵陣旣交。殺傷相當。而伏兵忽起。山坳。友諒兵大敗。擒戮無算。遂復太平。秋八月下。銅陵之臨山寨。冬十月。掠黃橋及馬馱沙。歲辛丑春二月。征高郵。夏四月。陞後奕統兵元帥。秋八月。上親率六師伐僞漢。以報龍江之役。公從行。道經安慶。攻破其水寨。遂乘風直泝小孤山。抵九江。九江。僞漢都也。距九江五里。所友諒始知。意謂神兵自天而下。友諒宵遁。遂克九江。獲其玉研華蓋日月旗等物。公復分兵攻黃梅、廣濟。冬十月。克瑞、富、臨江、吉安諸州。復回師攻安慶。下之。十有一月壬申。進克撫州。友諒旣遁。謀移都武昌。公承命攻其沌口壩。歲壬寅春正月。從上征南昌。兵至彭蠡湖南昌降。三月。取新淦州。已而祝某康泰據南昌叛。殺守臣葉琛。公率精甲從魏公。復其城。夏四月甲午。城破。公左肩爲砲所傷。久之。乃瘳。上壯其爲人。超授僉江南等處行樞密院事。羅友賢據池州。神山寨以叛。冬十有一月。公與忠武王平之。僞漢餘黨建柵南昌之西山。號爲八陣指揮。十有二月。公從趙將軍破之。俘獲三千餘人。江右州郡。

雖已附往往觀望狐疑未卽決歲癸卯春三月臨江吉安富州三城叛公皆先後統兵復之上以南昌實西江重鎮襟江帶湖控荆引粵非宗藩不足以授綏定之寄於是詔皇姪大都督授以節鉞往蒞其地而公實統精兵受節制夏四月壬戌友諒帥強兵十萬攻圍南昌癸亥公統步卒數千闢城門迎戰僞將金指揮操戟直前公彎弧一發應弦而仆敵氣大挫而退明日復合自是晝夜環攻城友諒親督促之勢在必取公贊畫祕計分命諸將隨方應敵剪獲甚衆六月辛亥公巡城至東門敵發蹶張中其腰脅箭深入約六寸公卽拔出之且撫髀歎曰吾自壯歲從軍傷於矢石屢矣其重無踰於此者豈命也夫然大丈夫死卽死耳復何憾所恨者不能從主上掃清中原稍效微勳垂令名於竹帛爾丁巳遂薨於私第年三十有九軍中涕泣相弔上聞之悼惜不已遣使者來致祭冬十有一月獻護柩車至南京以丙子葬於牛首山安德鄉下堡之原上念其功復命日謁者賄以布帛菽粟有差歲甲辰春三月遂命獻代領其衆秋九月下中書議贈公榮祿大江西等處行中書省平章政事上柱國追封梁國公敕有司建廟南昌歲時祭享歲戊申正月乙亥上卽皇帝位始定國號建元洪武追念開國元勳皆命配享仁祖湧皇帝廟廷公位居其八實異數也公爲人沈鶩而簡默剛明而質直馭下嚴肅一號令之加旗幟爲之改色是以戰無不勝攻無不下及從大將征伐尤能恪守軍令不敢違尺寸君子以此多之生平雖未嘗讀書隨機應變其智如神動與古名將合兼之臨難不懼奮弗顧身而於孝友之道尤爲篤至信所謂間氣所生之良將也公娶王氏因公來歸歿於軍追贈梁國夫人繼室朱氏先公若干年卒子男一人獻王氏出也臣聞之

龍蛇起蟄山澤通氣與運相值有開必先此古今通義也惟我皇上龍飛臨濠建萬世不拔之基一時將帥大臣多其鄉里之豪俊如公者亦一人也蓋昊天有成命旣生聰明睿知爲天下君必有賢臣經綸而翼衛之此意已定於冥冥之中久矣自壯歲從戎何役不隨何戰不與所以輝耀其威靈者亦云至矣使假之以年勳業炳朗當不止於斯惜乎不見海嶽大歸於一統也其亦命也夫然而聖恩沛滂追命錫爵旣備極於寵榮有子能久亦足上承宸渥宿衛殿庭公之不沒者蓋有在矣古者諸侯計功稱伐書之於太常勒之於彝鼎以示其不忘是用上遵詔旨備書公之勳績繫之頌聲以昭示承休於豐碑焉頌曰洸洸將軍川嶽之英捷如俊鷹金瞳鐵劙臨風一擊百禽震驚當元季世四海雄吞續紛戰塵白晝翳昏執戈而興擎風躍雲真人龍飛屆滌之陽單騎來歸願備戎行帝曰俞哉羣慝爾攘元有將臣牛渚駐師公揚靈旗隨帝殄夷拔其水營雲散鳥飛於時羣豪割邑據都伐木建柵壅川爲瀦視帝指呼有剪是屠孰爲最強犬牙其中僞漢居西狂吳在東登我叛人軼我疆封無征弗從有戰必先斬將搴旗電逝飈旋敵人畏之縮衄莫前何彼凶殘犯我龍灣公扼虎口屹爲雄關六軍奮呼殺人如山帝乃誕怒肆行天誅公時在行勇若虎貔俘厥寶玉僞都爲墟胡不爾思復攻豫章恃其冰山以凌太陽公亟出遏殲彼豺狼堂堂畫巡出其東門不虞飛矢竟斃其身軍中慟哭於夜亦聞天祐我朝實生俊英碉戈淑旂統馭萬兵胡命止斯不觀厥成天聲四震漢陪吳搖中原旣定外邦畢來使公之存績用益恢天子念功禮備褒旌錫爵上公配享廟庭命書絢爛榮賁泉城牛首之山有墓在原禮官奉詔表此武勳以鴻厥慶以示子孫

敕賜開國輔運推誠宣力武臣榮祿大夫柱國廣德侯加贈特進榮祿大夫右柱國進封巢國公謚
武莊華公神道碑銘

自古興王之際天既生真人拯民塗炭之中必有如虎之將弘展其丕猷弼成其大業此如燭照而龜卜
蓋無疑者以漢唐言之則雲臺二十八將凌烟閣二十四人是已洪惟皇帝當四海逐鹿之秋龍飛淮甸
噓陽吸陰反掌之間廓清八極遠荒蠻徼罔不臣妾當是時謀臣猛士效忠宣力其衆如雲若和陽華公
亦其一人也歟公諱高姓華氏字則未聞所謂和陽則其所居之郡也曾大父汝德贈中奉大夫湖廣等
處行中書省參知政事護軍追封武陵郡公祖妣張氏追封武陵郡公曾祖妣張氏追封武陵郡夫人大父某贈
資善大夫湖廣等處行中書省左丞上護軍追封武陵郡夫人父德新贈榮祿大夫湖廣等處行
中書省平章政事柱國追封灤國公妣童氏追封灤國夫人公之生也挺然有英氣人見之者咸曰是子
異日必亢厥宗及壯其材果超羣類不屑屈人下同黨多嚴憚之至正中天下大亂所在寇盜乘時爲患
害屠戮其黔黎蕩析其室廬剽斂其玉帛公慮蹙迫州境卽於所居黃墩結集水砦召募強丁淬礪刀劍
晝夜爲禦侮計練閱有法暗合古之將略遐邇聞者多荷叟相從於時帝初起兵臨濠智勇之士雷動而
霧集公遂帥衆而來隸於麾下及大兵飛渡長江進克采石繼攻蕪湖駐溧水而定建業擣京口而下江
陰公皆從諸將建立奇勳會張士誠據有淮浙數州之地肆爲不恭侵軼邊陲帝乃震怒遣大將出師討
之公復在行摧敵於舊館陷城於姑蘇拓土於淮東其功號爲尤偉蓋公自從軍授以先鋒之職八轉至

榮祿大夫湖廣等處行中書省平章政事迨夫大統既集帝念將帥百戰之勞定功行賞上則公爵次則侯封各錫以鐵券金書傳示子孫俾世其祿於是授公開國輔運推誠宣力武臣榮祿大夫柱國封廣德侯食祿六百石公未及受券請命往廣海巡視城陴整飭軍隊行次崖州以疾薨於官舍年五十有九實洪武四年三月二十七日也訃聞帝懷悼不已詔有司迎公之柩以是歲六月某日還葬於黃墩先墓之次藏券墓中以慰公於九泉且進封巢國公謚曰武莊階加特進勳加右柱國褒崇之意無不備至公子景春蚤世竟無嗣續其配澧國夫人蔣氏先薨至是與公合葬焉既葬禮部以聞帝若曰其令國子司業宋濂製爲碑銘樹諸神道尙書臣陶凱卽日傳命授臣臣不敢辭臣聞傳記所稱用世之士非才勇爲難而炳於幾先者爲難公當羣雄鼎奮之時亦欲以扞障自效見帝之頃卽知天位之有在人情之所屬統其部曲驩然來歸非有先幾之識者能之乎其建樹功烈安享尊榮爵封上公位躋極品亦宜也雲臺凌烟之衆又豈得專美於前乎臣旣歷序公之戰功次第於右復繫之銘辭曰

士之所貴炳於幾先誠獲所依身名兩全當元之季王綱解紐羣雄虎爭鹿知誰手維武莊公家於和陽依水建砦以遏寇攘皇帝龍興知爲真主仗劍相從率先多士帝曰俞哉爾兵我從卽麾義旗同渡大江牛渚旣殲蕪湖亦捷溧水洋洋視如一髮天兵載揚翔鷗震霆秣陵南徐次第而平況此江陰勢如破竹兵鋒所向無強不衄鄰有勍敵據浙連淮來撼大樹何哉蚍蜉叶皇赫斯怒命將行伐鏟破連營淳除窟穴復敕雄師定淮之東載綏載寧載約其同凡斯諸役公無不與展力據誠亦云備至天清地寧六合一

家大統既定，論賞有差。黃金鏤書，鑄鐵爲券。作誓剖符，千齡弗變。皇恩下被，將膺寵榮。訃來海南，聞者涕零。宸衷憫惻，爲詔郡縣。旋其柩車，就鄉而窆。崇階峻爵，極於上公。龍光有赫，賁及幽宮。儒臣作銘，播揚嘉績。百世之下，視此貞刻。

元故嘉議大夫禮部尙書致仕贈資善大夫江淵等處行中書左丞上護軍追封譙國郡公謚文節

汪先生神道碑銘

濂奉敕總修元史。凡忠義循吏之事。天下郡縣悉上史官。而宛陵汪先生獨闕。旣而先生族子克寬來與纂修。始以其門人汪文炳所摭事狀相示。濂旣命史官刪削立傳。克寬以爲史乃一代成書。其法當略。墓文乃私家所識。其紀宜詳。復致其孫德垕之言。請濂揭銘於隧上。嗚呼。先生之德之盛。海內孰不知。而所讞錢珍之獄。泰定實錄中嘗書之。其可不備載以昭示方來乎。先生諱澤民。字叔志。姓汪氏。其先新安歙縣人。自唐以來爲宦族。五季之初。兵馬使都虞候道安。始自歙遷婺源之還珠里。又歷八世。至宋天禧己未進士。祕書丞。贈光祿少卿。震生慶歷癸未進士。都官員外郎。贈中大夫宗顏。都官生。皇祐壬辰進士。左奉議郎。知漢陽縣。贈少傅穀。又自婺源遷饒州德興之龍溪。少傳生。贈通奉大夫槩。崇寧癸未進士。正議大夫。端明殿學士。藻藻以文學政事爲時名臣。通奉生紹聖丁丑進士。朝散大夫江西轉運使。愷。知合肥縣。贈中散大夫。愷又自德興遷宣州之宣城。子孫遂爲宣城人。中散生紹興庚辰進士。通判隆興府。鴻舉。鴻舉之弟修舉。則先生高祖也。曾祖諱宰臣。贈朝奉郎。祖諱夢雷。淳祐辛丑進士。累官知靖州。元贈翰林

直學士亞中大夫輕車都尉追封新安郡侯。父諱鼎，新用父廢補將仕郎。元贈嘉議大夫工部尙書上輕車都尉。追封新安郡侯。工部之兄鼎，享景定壬戌進士官池州大軍酒庫。然自少卿至先生，奕世科名。蟬聯不絕。先生自幼融通經史，亦銳然思繼承之。會科目之法行，遂領延祐甲寅江浙鄉薦。上南宮不利。有司用恩例署寧國路儒學正暨再舉，遂擢戊午進士第。授岳州路同知平江州事。階承事郎。時先生之母謙國郡夫人王氏春秋已高。先生以平江道遠，不可迎養。上書丞相府乞降一二階就銓鄰州。不報。竟奉太夫人之官。州有健民曰張，以利餌長吏，持其陰私，使不敢問。遂視閭井民若蠣虱，頤指氣使，輒奔走不暇。稍迕其意，即繫送於官。人懼呼爲張雷公。先生曰：「弗治我民將無生？」卽發其姦屏諸蠻荒，不使與良民齒。李氏有兄弟者三，素豐於貲。季弟未有子而歿。其婦傷季之天也，誓終身不再適。孟仲利其財，數設計撼之。婦堅不動，乃嗾亡賴男子，誣以姦私。婦不禁撈掠，自引伏。先生見其色有冤，間行廉察之，悉得其情。白而出焉。轉承務郎。南安路總管府推官。戍將朵兒赤跋扈自用，溢有司之擊，俾不得詘信。其媢家王某爲郡府史，藉其威尤鴟張無忌。擅鑿大庾縣令縣令訴諸府同官懼，戍將之威相視以目。無人發一辭。先生毅然捕王下獄，會監察御史行郡，戍將結以厚賂。御史召先生於庭，詰其獄狀，聲色俱厲。先生徐曰：「王之姦，人所知也。御史欲屈法邪？」御史慙夜半馳馬去。王卒伏罪，居亡何，戍將以贓敗。部使者知其故，檄先生推讞杖罪之。廣州歲祲，民大饑，疫癟淳臻，死亡相枕藉。其毒氣所薰蒸，鮮有能生者。江西行中書屬先生行賑荒之政。先生絕無所畏懾，命大姓發廩以哺庭羸。其病癟方熾者，召醫注善藥，親走其廬給之。

活者數萬。先生暨從者亦無他虞。將還送者讙曰：我父母也。奈何去之。馬擁不能前。潮州府判官錢珍挑推官梁楫妻劉氏不從。誣楫冒糴官中米殺之獄中。事連海北廉訪副使劉安仁。逮繫者二百人。中書移問者凡六。各懷顧忌。事終不白。先生讞之。獄立具。時珍已飲藥死。詔戮其屍。安仁坐受珍賂。除名。時朝廷遣奉使宣撫江西。聞先生名。命巡南安。章貢二郡。事得專決。聲績尤著。擢承直郎。信州路總管府推官。丁內艱。不赴服除。遷平江路總管府推官。階承德郎。初浮屠甲與隣僧乙有隙。久不相周旋。衆約其輸平。乙因邀甲飲酒。至醉。遂寢其室。甲弟子沈安素苦甲鞭笞。且期速紹其業。幸甲宿於讐。夜持刀往殺之。明日訴諸縣。乙虐於考訊。輒誣服。獄上。先生閱其刀有鐵工氏名。召工驗焉。曰：此沈安刀也。逮安一訊。卽承脫乙械械之。嘉定地瀕海。朱管二姓爲姦利於海中。致貨鉅萬。及以他事敗。上下受其賂。莫敢捕。獄久不決。先生與總管道童公適至。徑縛以來。竟籍其家。及徵其帳歷。備列省憲郡邑受賂之數。惟先生及總管名下疏曰：不受。陞奉議大夫。知濟寧路之兗州。兼管本州諸軍奧魯。勸農事。磁陽。負郭之縣也。孔子廟學久不建。先生以爲風教所繫。買地作之。殿堂門廡及齋序之屬。無不具飭。襲封衍聖公職。止三品。先生以宣尼之胄。不可以弗崇。上疏請增其秩。廷議諱之。奏陞品爲第二。錫以銀章。居一年。政化大行。絃誦之聲。周達乎西東。圓扉之間。可設爵羅。嘉禾生於縣郊。瑞麥孕於洮水。君子謂有漢循吏之風焉。廉訪使者行部。將壓境。還曰：汪兗州在吾可無往矣。至正癸未。詔修遼金宋三史。拜先生朝列大夫。國子司業。俾分修兵志。及宋理宗本紀。史成。有上尊束帛之賜。已而除集賢直學士。太中大夫。未數月。亟上納祿之請。以嘉議。

大夫禮部尙書致其事。先生旣歸，僦屋以居。門生弟子援洛中諸賢故事爲築室宛水之濱。先生日督諸孫讀書以自娛。不知其貧。歲壬辰，斬黃紅巾彭黨祖搆亂，其餘孽自徽寇宣州江東部使者道童問策於先生。先生語以收人心、振士氣、築城浚濠、儲糧簡卒，凡數十事。寇再至，再擊退之。乙未夏六月，長槍叛帥瑣南班程述等挾兵渡江，欲犯宣城。城中兵不滿數百，或勸先生去之。民曰：「先生忠孝人也，天必相之，當相與守城。」若果去之，各屬亦隨之爾。部使者不入沙周伯琦二公復申民言以爲請。先生曰：「昔江萬里寓鄱陽，大軍逼城，衆皆走散，獨坐守以爲民望。況宣民離合，視吾去留，吾何忍棄父母之邦乎？」時軍費不給，加以嚴刑，弗之集。先生從容一言，獲鈔一萬錠，米二千斛。民心翕然，欲爲固守計。屢戰輒屢勝。八月丁丑，江浙行省參政吉尼哥兒遣兵來援，城內恃援至，戍守頗懈。是夜三鼓，長槍軍攀堞而上，城遂陷。戊寅，僞萬戶丁堅使前鋒葛義執先生逼降，不屈，遂遇害。將死，罵猶不絕口。瑣南班雅敬先生名，爲具棺衾，葬於某山之原，得壽八十有三。事上於朝，贈資善大夫。江浙等處行中書省左丞上謹軍追封謙國郡公。下太常定謚曰文節。云先生娶戴氏，累封謙國郡夫人。先八年卒，子男二人，用敬以子貴封敦武校尉，常州路宜興州判官，用和國子生，辟充侍儀司舍人，不赴。兄弟痛憤不食，相繼卒。女一人，適劉士禮，孫男五人。德宣以蔭資補官，敦武校尉，善盈庫副使。德垕國子生，曲阜宣聖林廟司樂。德崇癸巳鄉貢進士，湖州路德清縣學教諭。德正，德進孫女一人，適吳愈。曾孫男五人，禧源、博源、鳳源、書源、清源。先生軀幹修聳，高準疎鬚，風裁峻如也。其爲學本諸六經，真知實踐，無一不本於道義。其奉親也，丁工部公之憂，則三年獨處於

外弗御酒肉。每遇諱日。悲慟不自勝。至老不變。事母夫人。則板輿方舟。迎侍之官。熙熙承顏。惟恐少違其意。婺源三大墓。爲強家所侵。辦理於有司。經四十年。必復之乃已。其事君也。一飯不敢忘懷。保小民甚如赤子。革弊除姦。有知殆無不爲。然於律己。則玉潔冰清。毫髮之私。又無自而入。故其至也。民戀愛之。其去也。民慕思之。至有爲生立祠者。嘗重構美章亭於寃賊至不忍焚之。且曰。此汪公遺澤也。嗚呼。不知先生何以能致於斯哉。由其立心之正。不爲勢利所誘。擇術之精。不爲不義所屈。忠孝大節。所以暴白於天下。揆古無讓。於今無愧。可謂不負於科目者矣。先生爲文。不事絲章繪句。而義理自足。詩亦清婉有魏晉風。尤以善書名家。單紙片牘。人咸藏弄爲榮。所著書有巢深、燕山、宛陵三藁。傳之於學者。當賓興之歲。江南三行省屢聘先生司其文衡。士論尤服其精允。至今人道之不忘也。夫自壬辰之亂。四方瓦解。其能執節不回者。往往於學士大夫見之。如余闕之死於舒。李黼之死於江。泰不花之死於台。尤號傑然者也。有如先生無城郭。封疆之守。或保身於山澤。君子亦未必深議之。先生不以仕止爲間。孜孜汲汲。思衛斯民於危亡之際。遂及於難。非事君無二心者能之乎。使人人皆先生。若國家其有敗亡之禍乎。悲夫。系之以銘曰。

仁皇建科。璽書四布。濟濟多士。雲集川赴。猗歟汪公。淳舉於鄉。對揚大庭。乃第奉常。筮仕遐邦。不遑將母。上疏廟堂。願從近授。孝聲載昭。如水東馳。公聞曰噫。吾分之宜。鋤強擊貪。鷹隼橫鷺。去之弗亟。我民之蠹。疊爲理官。爲獄立平。起彼朽骨。化而爲生。魯有名邦。待公爲政。瑞麥嘉禾。發爲祥應。策書載登。金匱啓封。

袞斧之寄有詔倚公尋教成均六館咸悅復直集賢進班邇列公曰止哉吾懸我車秩宗之加以華其歸拄笏看山宛水之涘遭時艱屯四郊多壘氓之蚩蚩非公疇依公苟我留執戟以隨一鼓作氣爭相奮躍刈寇如麻血污秋鐸孰援我兵夜柝不鳴彼乘吾懈遂無堅城毒霧四塞殺戮以逞執公使降白刀磨頸嚼齒大罵我實王官咄哉賊奴敢正之干公雖遇害之死弗屈孤忠凜然皦如出日事聞中朝當寧嘆嗟節惠易名恩寵有加所貴君子行爲民望薄俗瀾奔障之東向非孝無親非忠無君凡百在位視公爲人

敕賜開國輔運推誠宣力武臣榮祿大夫柱國淮安侯華君神道碑銘

自古以來人臣事君始終一心以上承明德所以保勳烈於不刊熙令譽於無窮此丹書所謂敬勝怠者吉是也其或遭時擾攘攀龍鱗而附鳳翼自赴於功名之會一旦封重爵享厚祿志盈氣驕唯欲之是從遂致壞法亂政蓋有其初而鮮克有終此丹書所謂怠勝敬者滅是也嗚呼敬怠之間善惡之所由分禍福之所由繫臣某於淮安侯之事不能無深感焉侯諱雲龍字某姓華氏安豐人世爲農家圖譜喪不知其先世遷移之詳三代皆以侯貴累膺贈典曾太父六二府君中奉大夫北平等處行中書省參知政事妣王氏夫人大父七二府君資善大夫北平等處行中書省左丞妣韋氏夫人考子中榮祿大夫北平等處行中書省平章政事妣陳氏夫人侯生二十年元季兵亂挈家避難悵悵無所之皇帝龍興臨濠四方豪傑荷戈雲從侯上謁轅門命爲帳前小校當是時人心旣歸踴躍用命上帥大軍取滁州元戊將遁去和與滁接壤聞之喪膽繼復取之遂大招舟師渡大江太平父老望旌旗迎降侯後先從征由千戶進鎮

撫陸萬夫長曾未幾何上攻金陵下之侯擒元將李將軍授總管之職尋隨諸將取廣德淳擢統軍元帥僞漢陳友諒據九江爲都時侵我邊陲歲庚子傾國而東陷姑熟直犯我龍江上授諸將方略設伏於險赤幟一揮伏甲盡出大敗僞漢兵侯亦有助戰功後三年友諒弗悛舊惡攻圍我江西上親帥六師往討友諒恐退入彭蠡湖與大軍遇相持四十餘日其大戰凡三友諒受矢斃於舟中龍江彭蠡二役侯在行中復以功陞豹韜衛指揮使繼從伐荊州又同征江北郡縣而泰州高郵淮安次第平轉淮安衛指揮使就留鎮之吳元年丁未大將軍徐達奉詔征中原侯復在行中齊魯既定河南之民簞食壺漿以迎王師暨入燕元君棄都而逃立北平等處行中書省授侯鎮國上將軍僉大都督府事分府北平拜資善大夫燕王府左相兼北平行省參知政事及天下大定論功行賞加開國輔運推誠宣力武臣之號官祿大夫勳柱國爵封淮安侯食祿一千五百石前職如故尋兼燕山衛都揮使時北平新入職方非勳舊大臣不足以壓服之上以侯爲鄰郡子且恩遇之深不翅骨肉至親必能爲國宣力故特託以方面重任豈期侯昧於理動違邦憲據元丞相脫脫大第居之凡元宮龍榻鳳輶及金玉寶器非人臣可僭者皆用之弗疑已而以其第高曠蓄害屢生復役戰疲之士創殘之民唯新室是圖奢麗過制甚此猶可也先是元故都破其達官之女多與我師爲婚媾幼主尙竄沙漠譟者因倚之偵我事情上明照數千里外屢勅中書移文北平凡舊仕於元者悉遣發江南毋使爲民患害侯皆廢格不行及至征討副將軍李文忠北征獲間譟數人始知故宦之家有官兵馬司者相率構姦僞作文榜欲爲變托姦人以爲巡邏之職將焉禦

寇此非侯之過歟上猶念其功不忍寘于法趣中書諭其盡遣侯仍弗之聽上怒詔內官往歷指其主名諭之侯始不得已奉詔侯自是益怠於政日從事歌舞燕飲遂得羸疾疾寢劇上召還南京以洪武六年六月二十八日卒享年四十又三娶繆氏累封淮安夫人子二人長曰忠次曰關注女一人以七月十日葬京城之西石灰山之陽上親御翰墨製文一通遺中官致奠焉惟侯奮起戎行出遇真人乘六龍御天從征四方粗著勞效初無獨建奇功駿烈照耀人之耳目然而封以大郡錫之侯爵寵恩之加不爲不重矣奈何靡思補報徇欲敗度絕無憂國恤民之心乃知往古韓彭之流怙功自專卒至夷滅皆其自取焉爾所賴聖天子推天覆地載之量保全功臣唯恐有毫髮不至故侯得令終於家享榮名歿世豈非幸歟故事生封侯者沒必加之以公於是敕止以侯禮聊示薄罰可謂仁之至義之盡者也臣濂奉敕撰神道之碑稽諸天理之正察乎人心之公不敢用昔人誌墓常法特取春秋直筆褒貶之義勒文穹碑以爲千萬世人臣之勸戒云銘曰

人臣事君兮猶如事天寅畏是將兮終日乾乾慎終如始兮曷敢弗虔一或怠逸兮明命在前侯起戎行兮有力如虎逢時釋驕兮擇歸真主四征弗庭兮無役弗與斬將搴旗兮所向披靡帝用嘉錫兮龍光日殷疏以侯爵兮作鎮北藩兵民二柄兮付之旬宣鞠躬盡瘁兮宜報國恩胡昧爾心兮動違國憲僭侈是崇兮羣生胥怨峻宇雕牆兮朝夕沈湎是非倒置兮大分莫辨皇仁如天兮覆之幬之錄其助庸兮恤之崇之君恩固弘兮臣行或虧生弗爲善兮死其忸怩春秋直筆兮善惡莫掩萬世取法兮納人於檢墓門

有石兮可比琬琰史臣勒文兮以示褒貶

故資善大夫廣西等處行中書省左丞方公神道碑銘

洪武七年三月某日資善大夫廣西等處行中書省左丞方公歿於京師鍾山里之私第既已襄事而墓門之石未有刻文九年冬十一月其子禮恐公羣行壙沒無傳請於大都督府移文中書下禮部於是尙書臣籌以其事聞制曰可遂敕翰林學士承旨臣濂爲之銘臣謹按留守都衛經歷天台詹鼎狀公之行曰公諱珍避廟諱更名真因字谷貞姓方氏其系分自莆田再遷台之仙居三遷於黃巖遂占籍焉公長七尺狀貌魁梧而身白如瓠有偉丈夫量未嘗宿怨識者已知其爲貴人至正初李大翁嘯衆倡亂出入海島劫斂漕運舟殺使者時承平日久有司皆驚愕相視捕索久不獲因從而綏輯之劇盜蔡亂頭聞其事謂國家不足畏復效尤爲亂勢鴟張甚濱海子女玉帛爲其所掠殆盡民患苦之中書參知政事朵兒只班發郡縣兵討蔡寇公之怨家誣構與其通逮繫甚急公大恐屢傾貲賄吏尋捕如初公度不能繼且無以自白謀於家曰朝廷失政統兵者玩寇區區小醜不能平天下亂自此始今酷吏藉之爲姦媒蘖及良民吾若束手就斃一家枉作泉下鬼不若入海爲得計耳咸欣然從之郡縣無以塞命妄械齊民以爲公民亡公所者旬日得數千久屯不解朝臣察其非罪奏爲慶元定海尉使散衆各安其居自時厥後汝穎兵大起海內鼎沸齊國忠襄王李察罕保釐河洛晉冀李思齊張思道號令關陳陳友諒明玉真分有江漢荆益張士誠據淮淛公亦有慶元台溫三郡之地同縣章子善者好從橫之術走說公曰夷狄

無百年之運元數將極不待知者而後知今豪傑並起有分裂之勢足下奮鬱一呼千百之舟數十萬之衆可立而待泝江而上則南北中絕擅餽運之粟舟師四出則青徐遼海閩廣甌越可傳檄而定審能行此人心有所屬而伯業可成也公曰君言誠是然智謀之士不爲禍始不爲福先朝廷雖無道猶可以延歲月豪傑雖並起智均力敵然且莫若爲主保境安民以俟真人之出斯吾志也願君勿復言子善謝去公自是其官累遷至江淵行中書參知政事會有詔徵兵討張士誠公遂出師士誠知公且至遣其將史文炳呂真統十將軍兵七萬禦公於崑山崑山去姑蘇七十里士誠之僞都在焉文炳真陳兵城中仍以步騎夾岸爲陣士誠命游兵往來旌旗數十里不絕氣勢甚盛公曰濱海之地非四達之衢乃復參用步騎兵雖衆不足畏也公舟師僅五萬身率壯士數百趨碭子橋文炳真使十將軍薄水戰矢石如雨公戒其衆持葦席藉塗泥冒矢石急奮夾岸之軍以火箭亂射公燎及鬚鬢橫刀大呼而入殺兩將軍及十餘人軍大潰若禽鳥散去公與壯士追擊趨其中堅文炳真接戰公出入陣中所嚮輒披靡橋左右水騎訖不得成列而岸上軍又散北文炳真棄馬走亡七將軍溺死者萬計公乃次兵於岸明日又戰七戰七捷直至城下士誠得報遣使者送款請奉元正朔公還遂以節鉞鎮淵東開治於鄞元之君臣多公之勳復數加爵賞俄至太尉江浙行省左丞相賜衢國公印章昆弟子姓賓客皆至大官當是時今上皇帝龍興臨濠定鼎金陵天戈所指無不簞食壺漿以迎王師上親取婺州而衢處相繼降公曰吾聞順天者昌逆天者亡今臨濠兵精甚所至無堅城此殆天命之所在也逆天不祥卽遣子完入侍上喜曰自古英雄以

義氣相許。當如青天白日。事成同享富貴。何以質子爲。遂使完歸。公復遣使者願守城邑。如錢鏐故事。歲貢白金。以給軍費。上許之。然猶自海道輸粟元都。時羣雄力爭。上方勵志中原。公獨屏蔽江海。使者交於二境上。唯求庇民而已。苗軍劉震蔣英等叛婺州。殺首帥胡大海。持其首來。曰願隸麾下。衆皆賀。獨公不許。曰吾昔遣使效錢鏐言。猶在耳。今納其叛人。是見小利而忘大信也。且人叛主而歸我。卽他日叛我。又安可必耶。遂帥師擊之。仲兄中流矢而沒。上遣使臨祭。且慰撫其遺孤。越數載。上詔大將軍徐魏公平姑蘇。縛士誠獻京師。公以久疾不視事。又幕府賓客無所陳說。失朝賀禮。上怒。大軍且壓鄞。公憂懼不知所爲。乃封府庫。具民數。使城守者出迎躬挈妻孥避去海上。使完奉表謝曰。臣聞天無所不覆。地無所不載。王者體天法地。於人無所不容。臣荷陛下覆載生成之德久矣。安敢自外於天地。敢一陳愚衷。惟陛下裁幸。臣本庸才。處乎季世。保境安民。非有黃屋左纛之念。曩者陛下霆擊雷掣之師。至於婺州。臣愚以爲天命有在。遣子入侍。於時固已知陛下有今日矣。所謂依日月之末光。望雨露之餘澤者也。而陛下開誠布公。賜手書。歸質子。俾守郡縣。如錢鏐故事。十年之間。與中吳角立。皆陛下之賜也。逮天兵下臨吳會。臣嘗上書。謂朝定杭越。則暮歸田里。不意今年以來。老病交攻。頓成昏昧。而弟兄子姪。志慮不齊。致煩陛下。興問罪之師。方懷憂懼。未能自明。而大軍已至台溫。令臣計無所出。雖遣使再三。而承詔之師。勢不容已。是以封府庫。開城郭。以候王師之至。然猶未免爲浮海之計者。昔有孝子於其親也。遇小杖則受。大杖則走。臣之事適與相類。雖然。臣一介草莽。亦安敢自絕於天地。故每自思。欲面縛待罪闕廷。復恐陛下萬一。

震雷霆之怒天下後世議者不謂臣得罪之深將謂陛下不能容臣豈不累天地之大德哉謹昧死奉表以聞俯伏候命上覽表趣公入覲公至京師上且喜且讓曰若來何晚也公卽叩首謝罪上以公誠慤遇之特厚每賜宴饗皆與功臣列坐未幾有廣西左丞之命俾奉朝請一日侍上燕坐不能興興至第則成末疾矣上數遣中使賜問官其二子禮宣武將軍僉廣洋衛親軍指揮使司事完忠顯校尉虎賁衛千戶所鎮撫令公得親見之已而公疾革上遣中使問所欲言公指使者中坐良久曰臣荷陛下厚恩無尺寸之功而子孫庸魯絕不知人間事臣所憂者獨此耳幸陛下以臣故曲加保全則臣感恩九泉爲犬馬報陛下矣言畢而逝壽五十有六上聞哀憫之親御翰墨爲文命官致祭皇太子暨親王亦如之中書省大都督府御史臺亦皆奉上旨臨祭成禮而去先是公病時嘗屬諸子曰我卽死毋歸葬海濱主上遇我過厚可求皇城外之地埋焉且使後人習於禮義及是卜城東二十里玉山之原惟右禮部爲奏請上欣然可之於是以某年某月某日葬禮也公世爲善人而其父尤柔良人弱之屢致侵蝕父笑曰吾諸子當有興者毋久苦我其後五子果貴顯元季以公之貴得屢贈三代曾祖天成榮祿大夫湖廣等處行中書省平章政事祖宙光祿大夫福建等處行中書省平章政事勳皆柱國爵皆封越國公父伯奇銀青榮祿大夫淮南等處行中書省左丞相上柱國仍追封越國公曾祖妣陶氏祖妣潘氏妣周氏妻兩董氏皆封越國夫人子男五人其二卽禮與完其三曰本曰則曰安女五二適士族餘在室孫男六隋大業末海內紛紜汪華聚衆保民據有歙宣杭睦婺饒六州之境雖屢受隋爵及唐高祖有天下遂封府庫籍民數以歸

職方擢爲欽州刺史歿於長安其事與公似無大相遠者蓋公以豪傑之姿庇安三路六州十一縣之民天兵壓境避而去之曾無一夫被乎血刃其有功於生民甚大然而天寵所被賜官丞轄享有祿食而二子皆列崇階赫奕光著視唐則有加焉於是歷序其故著爲銘詩以宣朗國家之鴻烈而及公保民之偉績云爾銘曰

元季紛紜羣雄相吞公據海濱志欲靖民黃屋左纛我非敢覬綏定一隅以候真主曠馭煌煌出自東方天威奮張孰敢不來王乃籍土地乃封府庫大開城門委之而去皇帝詔還喜動龍顏卿能庇民朕數嘉嘆卿居海邦倚水爲強旌旗揚揚武夫洸洸舳艤數千橫行海中諸蕃畏威莫越其封炳乎幾先能順天命卒全黎元兵不血刃何哉暴強驅民鋒鏑酣戰弗禁身乃就殮以此較彼卿實爲能爵之崇階祿給子孫天語褒嘉金宣玉奏公拜稽首天子萬壽惟公挺生人中之豪功在三府其惠孔昭華之保歟事與公類至今廟食春秋不廢公雖歿矣德曷忘矣太史銘矣發幽光矣

故資善大夫御史中丞兼太子贊善大夫章公神道碑銘

嗚呼是爲吾友龍泉章公之墓初予未識公時輒稔聞其名及公應聘而起同赴於南京同館於青溪同出入禁署以備顧問如是者三四年私竊以爲生我者父母知我之志者唯公而已不知公何爲棄予而遽死矣乎有善孰予相孰知我瑕疵而攻之乎神道之銘公之子特以爲屬肝腸百裂其何能緝言辭乎相知之深者不爲之則鋪張君子之休美不識當屬之誰乎因欷淚而序之曰公諱溢字三益姓章氏

處之龍泉人遠祖有曰巖者仕宋以兵部尙書守泉州始家於南安至唐康州刺史及又自南安遷建之浦城及生福州軍事判官修修生光祿大夫檢校太傅西北面行營招討制置等使持節高州諸軍事高州刺史仔鈞娶練氏生子十五人其第三子獻誠仕南唐爲銀青光祿大夫檢校司徒獻誠生文錫仕宋爲祕書省校書郎文錫生都官郎中重又自浦城遷於龍泉子孫遂爲龍泉人重生吉吉生順順生公琛公琛生世安世安生舉舉生宗宗生鄉貢進士輔輔生聞義聞義生用之用之生強宗強宗生煥文則聞之高祖也曾祖諱斯立祖諱格父諱遇孫母某氏公之始生其音如鐘父母疑爲不祥幾棄不舉及成童巍然莊重不習鄉井輕儂態諸兄出應科繇頗爲儕類所侵苦公忿曰彼徒謂我弱爾吾不自厲豈爲男子耶乃往受事縣官即有曲者舉正理直之衆始愧服比弱冠從鄉先生王剛叔游從事於正心修身之學既又聞金華爲文獻之邦間出游以咨叩其統緒浙東憲使禿堅不花請與語悅之已而改官陝西要公與俱至虎林心忽驚悸力辭而歸抵家父病已革越八日而逝人以爲純孝所感至正壬辰斬黃妖寇自閩犯龍泉公與從子存仁避亂山中而存仁爲寇所執公心計曰吾兄止有一息不可使無後挺身出謂賊曰兒幼無所用我願代之賊聞公名方出重購以求及得公大喜賊帥欲問計公正色拒之曰若等皆有父母妻子顧爲此滅族事耶賊怒繫之柱以刀磨其脅曰不降者且死公曰貪生惡死固人常情然吾終不爲不義屈賊愈益怒曰汝誠不畏死耶公曰死卽死何畏乎賊壯之不敢加害公夜給守者乘間脫身歸乃集里民爲兵不旬日擊卻之處州府判官以兵來龍泉欲盡誅平民誑誤者石抹將軍宜孫實

總兵政公走麾下說曰將軍知賊之由乎曰不知也公曰貧民迫於凍餒故相挺而從盜誠得一循吏招輯之民卽平民耳今不出此而肆行剪屠是殆揚湯以止沸也不識可乎石抹將軍曰善微先生言事幾敗卽檄判官毋擅殺石抹將軍服公器識留幕下與議軍事其平屬縣慶元及建寧之浦城松溪羣盜公有力焉上其功江浙行省丞相康里公承制授公將仕郎龍泉縣主簿辭不受海寇起黃巖掠沿海郡縣行省命石抹將軍守台城台之寧海民亦爲變攻圍台城急石抹將軍飛檄召公爲援公方退居田里得將軍檄卽起曰吾邦非石抹將軍人且盡爲枯骨今一旦有急正我報德之秋也集趨勇少年數百人晝夜行至城下約內外夾擊賊遂潰海寇亦遁去寧海大飢豪民吳甲蔣乙積粟不耀公言於石抹將軍將軍因屬公行縣賑之公至縣卽抵二豪罪發其粟賑餓夫其尤困者俾僧作糜食之公還龍泉龍泉亦歲儉大家有粟高其直且不發公先以私田易粟貸里人乃行勸分之政民受其惠爲多鄰邑青田潘惟賢爲盜而龍泉監縣寶忽丁貪虐無狀民因導潘攻縣治寶忽丁棄印走公同其師王剛叔召豪傑與賊戰敗走之縣治遂復行省給銀幣爲賞寶忽丁懼棄職獲罪而愧公有功乃謀害公公方贊元帥黑的兒開府處城未敢發會帥府問寶忽丁罪遂結季溪惡少拒命首害剛叔於家帥府檄兵襲擊之寶忽丁遁去於是處之七縣盜皆盡起行省移石抹將軍以行樞密院判官分治處州公謂石抹將軍曰松陽小醜不速平將養成大患耶將軍曰唯君處之公乃遣千戶曹勝安督兵授以方略一戰盡降之分院上其功行省陞承事郎松陽縣尹又辭不受元帥葉君琛攻鄭寇於麗水屢爲所敗分院調公及樞密院都事胡君

深合討之。公與胡君統軍至浮雲，賊衆來逆戰，並山爲長陣。兵旣接，我軍張左右翼夾攻之，賊大敗，直擣其巢穴。賊望見公來，拜乞曰：「我非爲寇者，待我殲此海蠻，即降矣。」海蠻謂葉君所部海軍也。公曰：「吾不知他，特捕反者爾。」賊爲內外二砦。公麾兵踰外砦立壁，或疑壁於兩砦間非利。公曰：「非爾輩所知。我旣踰外砦，則內砦疑其已降，而外砦亦計其疑已。」二砦相疑，破賊必矣。壁未完，賊突至，相持未有勝負。公麾奇兵橫擊，賊奔北，卽移兵圍內砦數重。下令急攻，遂陷之。執鄭寘諸法，外砦亦降。行省復授福建行省檢校官，尋又改除奉訓大夫、處州路總管府判官，皆不受。南行臺治書侍御史鍊木烈思分臺於婺，長槍軍叛迫其城，治書遣從事楊迪徵師於公。公勒所部軍就道，長槍聞公至，輒引去。省憲交章薦於朝，除武德將軍，僉浙東都元帥府事，又辭不受。或疑爲要名，公曰：「吾所將皆鄉里子弟，使其肝腦塗地，而吾獨敢功名弗忍爲也。」青田賊吳英掠婺之金華、永康、東陽諸縣，聚衆猖獗。公議討之，分院乃調兵屬公及胡君。與賊屢戰，皆敗之。賊勢蹙，縛其黨張貴、李興甫等出降，遂昌凶右戶閉耀、土豪周天覺、嘯聚殺之。元帥胡君往討，天覺負固不服，久之始請降。公曰：「此賊不殄，必貽後患。」胡君不聽，受其降，已而天覺果以復叛誅。始天覺之未降也，執其黨與三百人繫諸獄。至是，胡君欲盡坑之，公執不可。得生全者十六七。時天下日入於亂，公結廬匡山上，自號曰匡山居士，屬其子曰兵將至矣。汝曹其保障州里乎？己亥冬，王師克處州，公又避建業，入見。上問勞曰：「我爲天下屈四先生耳，然四海紛紛，何時定乎？」對曰：「天道無常，惟德是輔。」惟不嗜殺，地入閩中。今上皇帝遣使以東帛召公，公乃幡然而起，與青田劉君基麗水葉君琛、金華宋濂同赴召，至

人者能一之耳。上曰：卿等其留輔予矣。亡何，擢僉營田司事，巡行江東、兩淮之境。田荒蕪及耕墾者，皆分籍之，差稅賴之以便。公以疾在告者久，上時遣使存問，及疾小愈，卽入謁。上見其來，喜曰：疾其瘳乎？何遽出也。一日，上忽念公，詢於中書左司都事張來碩曰：章溢日來康強否？來碩對曰：溢日夜念母不置，而以主上遇之厚，不敢以言鬱鬱成疾耳。上卽命公歸省，賜以白金文綺，而留其季子存厚於京師。浙東始設提刑按察司，卽擢公僉其司事。尋命還處州代總制。胡君入朝，而爲存厚娶胡君女，賜賚優渥，且俾存厚入侍皇太子，以示親信。胡君出師溫州，復詔公還守處州，饋餉供億，規措無缺。而民不知勞，及師旋，卽日以總制事付胡君，而還其部。王師平荆楚，設湖廣提刑按察司，遷公僉司事。公入見，上慰勞之曰：紀綱之事，今屬卿矣。公旣至，覩荆襄多廢地，遂建議分兵屯田，且以控制北方計爲便。上曰：所言甚善。第未暇耳。湖廣行省鎮撫回回怙勢作威，輕重人罪，以爲常。公廉得狀，坐以法。曾未幾，河內道按察司宋思顏以浙東憲史事不白，下獄。而浙東按察使孔克仁僉事王璿亦以事被逮，辭或連公。公憂懼不知所爲，上遣太史令劉君基喻公曰：予素知章溢守法令毋疑也。旣而胡君以兵入閩，陷沒處州之境，皆動搖。上命陞公浙東按察副使往鎮之。平陽瑞安浦城福寧軍民等事，皆隸焉。公辭曰：臣前任浙東無狀，同列皆獲罪，而臣獨蒙寬宥。今若加陞擢，則益重臣過疆場之事，臣身任之，萬死且弗避。副使之命，臣不敢拜。上重違其志，命仍僉浙東按察司事。比至山寨，或已叛。公宣布詔旨，軍民皆感動，乃誅其首叛者，餘皆帖帖。青田夏清聞胡君敗，與福建參政范昌大合寇慶元龍泉。時官兵盡戍浦城，城中僅足自守。公召舊部義兵，使據

要害列木柵爲屯勢相聯絡別命元帥祁興季汝卽龍泉縣治亦環植木城賊聞不敢犯公長子存道初以元帥戍浦城及是有旨命存道提兵爲遊擊而公卽處城坐鎮之公謂父子相統於律不宜乃上奏請罷存道官不允兵戍浦城者以食不繼爲病上以屬公泊浙東行省右丞李公文忠李公欲運處州糧餉之公以爲舟車不通而軍中所掠糧甚殷請拘入官而均給之兵食乃足青田稅官金甲發其同僚白乙匿官課乙旣誅死而甲恣爲姦利公訊之甲善口給辨數不置公曰汝罪狀已明奈何欲以口舌撓法乎其辭遂屈上知爲公所鞠當不冤命斬之建寧守將阮德柔遣使來納款人咸以爲詐公曰陳友定據全閩勢必不能容故德柔爲圖自全計非詐也以其事聞詔許德柔以元官守本郡命比下德柔果爲友定所并公因留其使厚存卹之溫州茗洋周遂卿恃山險常爲寇鄰邑皆患之而郵傳之通平陽瑞安者亦爲所要遮公命存道合平瑞總督孫安之兵擒斬遂卿中書命處州造海舟若干艘并僉溪船戶爲水軍其戶凡一千旣有領之者而又隸於軍府役繁而事擾公上奏設水軍千戶所專統之處多山而少田軍需恆不足胡君爲奏免唯輸硫黃白藤於朝而行省復有所科公屢以爲言罷之水軍千戶任惟淵朱仲欽其戍青田會寇至仲欽逆戰而惟淵走還仲欽以無援故敗公斬惟淵以徇遣指揮何世明擊寇走之惟淵乃胡君所任信者旣伏誅部曲莫不股栗浙江行省參政朱亮祖總兵取溫州公調何世明以軍從溫州平公聞其掠人子女命鎮撫林理徵之各部送還其家海隅旣寧公請朝京師上報曰吾知卿在邊良苦俟平吳當卽召卿爾及浙西諸郡皆平上遣使召公且命分兵征八閩而存道守處州公旣入見上

嘉獎甚至。且諭羣臣曰：章溢雖儒臣，父子宣力一方，寇盜盡平，其功誠不在諸將後。公再拜謝不敢當。明日上召問征閩諸將何如。公對曰：御史大夫湯和由海道進，平章政事胡廷瑞自江西入此，固必勝。然閩中尤服浙江平章李文忠之威信。若令文忠帥師從浦城取建寧，此萬全計也。卽日詔文忠出師，如公策處州之糧，其舊額一萬三千石有奇，後以軍興加徵至十倍，民不堪命。公言之丞相，丞相入奏上曰：吾勞處民久矣，詔從其舊。溫州黃宗雲朱君達來附，各授以元帥之職，還守其土。及我師征溫失利，輒叛去。溫既平，君達又請降。公曰：何物小醜，反而復降納之，是無法矣。奏戮之。浙江行省承詔作大舟，入海徵輸巨材，檄處州與諸府同。公曰：處婺之交，限以峻險，縱有水道，何從出？且凋蔽之民，曷以勝此？公力言於省臣止之。洪武元年正月，上卽皇帝位，有事於太廟。公與執事畢，越翌日，召公及劉君基入見。上御奉天殿，羣臣咸在。上歷陳其功，並拜御史中丞。公辭不允，尋兼太子贊善大夫。公務存大體，不屑屑於細故，或以爲言。公曰：憲臺百司之儀表，居其職者當先養人以廉恥，使人避而不犯，豈直恃搏擊爲能哉？上親祀社稷，會大風雨，還坐外朝，怒儀曹議禮不合，以致天變，將殺之。公奏曰：風雨已連朝，無足恠者。縱禮官議有未盡，陛下精誠足以格神明，願寬雷霆之怒。上爲之震威。上愛公甚，嘗語公及劉君曰：二先生年向耄，恐感霜露致疾，善自衛攝，不宜早趨朝也。存道部鄉兵萬五千，從李公入閩。閩平，詔存道以兵從海道北征。公持不可。曰：鄉兵農人耳，始令征閩，許以事平歸農。今復調之，是爽信也。上不擇而罷。公繼論奏曰：兵已入閩者，俾還州里。昔嘗叛逆之民，宜籍爲軍使北征，一舉而恩威著矣。上喜曰：孰謂儒者果迂闊哉？非先

生爲朕一行無能成茲事者公受詔遂行比至處州母夫人已歿公馳還舍援例乞丁憂詔不允丞相李韓公復貽書道上眷倚之意而遣存厚還家公灑泣而出日治戎事惟謹鄉兵旣集命存道部領由永嘉浮海北行上章乞如律守制詔仍不允已而章再上上覽之爲惻然曰吾固知其情不可奪矣但朕憲臺缺人耳遂可其奏存道至崑山走京師聽進止上諭之曰汝父事朕宣勞爲多今汝又帥師北上尙勉立事功以無忝爾父則予汝嘉因授以處州衛指揮副使戍於上黨尋移平陽公自喪母夫人悲戚過度居常忽忽若無以自存者及營宅兆親負土石而感疾益深子女見之皆相顧悽愴公曰勿憂也吾父母幸以安厝祖宗丘墓幸粗整飭歲時薦饗幸有條序吾庶幾無憾第荷國厚恩未能報效此爲歉耳臨終親友何濬來候曰當收斂此心毋有所執滯公曰吾久已知之遂薨於龍淵之私第實洪武二年夏某月某日也享年五十六訃聞上甚憫悼乃親撰文遣官卽其家祭之以其年某月某日葬於某山之原公娶陳氏勤儉恭淑克盡內助子男三人長卽存道明威將軍處州衛指揮副使次存誠次存厚女二人長適陳某次在室孫男四人集慶集恭集善集正女二人公性篤於孝友父喪未葬而盜發里閈室廬被焚公稽額顛天火至柩所而滅事母夫人備極孝養每事必得其懽心與二兄別居已久旣創第龍淵請二兄同居以奉母怡怡之情藹如也先世有墓祠曰標慶庵公起其廢一新之且益田以供祀事而定祭享之禮命子孫世守之其於宗族里黨患其子弟無所於學則創龍淵義塾延碩師以教之患其死者無所於葬則以玉峯西崗爲義阡聽其蘊瘞焉又以王剛叔實鄉郡之賢者而石抹將軍能忠於所事卽龍泉劍

水之陽作祠宇祀之曰忠賢祠蓋凡可以聳善扶義者無不爲也公狀貌宏偉器局聳曠而撫世酬物一本於誠一循乎禮義外若和緩而其臨大事則議論爭辨不避權勢必折衷於理而後已其與學士大夫談聖賢之道如味飴密尤篤尙伊洛之學嘗曰古人爲學皆躬行實踐人倫日用之間無非學也今人以記誦詞章爲務特學之末事耳故公於章句之習皆不以屑意而於綱常之大端有關於世教者恆切切爲人言之生平務在濟人利物嘉言善行人皆能道之不可勝紀也余竊聞之章爲東南著姓自五季以迄於宋代多顯者內則兩制八座外則州牧邑宰皆未嘗無其人親提師旅捍衛鄉州能成其勳名唯太傅公爲尤盛閩人至今道之公當元季紛擾羣盜四起磨牙吮血而桑梓爲墟公談笑而起皆剷殄之無遺育處之民至今思之於是聲光流顯上致萬乘之知持節諸部執法中臺其功業視太傅公疑若過之此無他太傅公之所遭者衰世公之所際遇者有道維新之朝也古人所謂能光前人者公其有焉予敢評駡公行勒諸堅珉以垂示永久於戲金或可銷也石或可泐也公之功不可忘也銘曰

五季之亂殺氣昏太傅隻手障南閩西巖結壘兵雲屯狗鼠偷竊方纘紛怒來欲以一氣吞陰功上聞帝爲欣敕生蟄蟄千子孫白笏堆床如爛銀匡山繼之譽益振方頤疎鬚目電焞音吐鴻鬯鍾在軒蚩蚩赤子扇妖氛額抹絳帕手握種嘯呼不異鬼魅羣公起長驅汗且奔一障屹立無邊塵較之太傅功或殷重微疊照絕等倫聖明天子御紫宸濟濟萬國咸來賓束帛往聘東海濱加以祿爵恩寵新庸田使者勞徠勤繡衣行部照青春貪夫宵遁不待晨一朝南徼將星湮枯山恍惚失嶠崿狐狸跳舞騁妖神帝曰章溢

汝老臣。整汝戎旆。旋汝轍。公車戾止。集吏民。導宣威德。語復諄。有叛命者。馘以徇。叶坐鎮鄉城。如虎蹲。大兒游擊。左右巡。四郊帖帖。多柔馴。召還執法。居諫垣。長跪敷奏。懼逆鱗。萱堂風慘。逝驚魂。上表陳情。達帝闕。哀號負土。自築墳。因劬致疾。亟返真。聞之。孰不淚霑巾。公知學術歸一原。時憲濂洛溉本根。所以不坐枝葉繁。文事武備道乃存。黃腸題棲藏山樊。大書遺行勒堅珉。傳千百載期無譏。

宋學士全集卷之十八

神道碑

大明追崇楊王神道碑銘

皇帝躬膺大寶式展孝思既追崇祖宗四代帝號建立太廟復念皇太后之所自出追封外王父爲楊王外王母爲楊王夫人建祠于太廟之東歲時遣重臣致祭近有來自淮陰者言王墓在盱眙如故上聞之悲喜交集卽詔內臣及圜丘署令往祭而脩治之置灑掃之戶凡三護視塋域且命詞臣撰文以樹諸神道臣濂伏讀御製王之行若曰王姓陳氏世爲維揚人不知其諱當宋之季名隸尺籍伍符中從大將張世傑扈從祥興帝駐南海至元己卯春世傑與元兵戰師大潰士卒多溺死王舟亦爲風所破幸脫死達岸與一二同行者累石支破釜煮遺糧以療饑已而糧絕計無所出同行者曰我等自分必死聞蜀體山有死馬共烹食之縱死亦得爲飽鬼不識可乎王未及行疲極輒晝睡夢一白衣人來謂王曰汝慎勿食馬肉今夜有舟來共載也王以爲偶然未之深信俄又夢如初至夜將半夢中髣髴聞櫓聲有衣紫衣者以杖觸王之膀曰舟至矣奈何不起乎王驚寤忽身在舟中見舊所事統領官時統領已降于元將元將畏舟壓凡有來附者擲棄水中統領憐王亟藏之皇板下自取乾餚從板隙投之王掬以食度王之渴乃與王約以足撼板王卽開口向隙受漿居數日事將洩皆彷徨不自安忽颶風吹舟盤旋如轉輪久不能

進元將大恐徧求於禁祀者不可得統領知王能巫術遂白而出之王仰天叩齒若指麾鬼神狀風濤頓息元將喜因飲食之至通州賚王數鉅魚送之登岸王歸維揚不樂爲軍伍避去盱眙津里鎮擇地而居以巫術行王無子生二女長適季氏次卽皇太后晚以季氏長子爲後年九十九歲而薨遂葬焉今墓是已臣濂聞之君子之制行能感於人固難而能通於神明爲尤難今王當患難危急之時神假夢寐挾之以升舟非其精誠上通於天何以致神人之祐而至於斯也王之羣行其詳雖若不可知舉此而推之則其積德之深厚斷可信矣是宜慶鍾聖女誕育皇上以啓大明億萬年無疆之基於戲盛哉昔日史臣贊堯之德首以親九族爲言其效至於黎民於變時雍之盛然九族之中母族居其三皇上以念母之故思王不能忘封以王爵享以祠廟今又樹碑墓道以紀其異行是皆以孝治天下也將見四方嚮風或知以孝自勉皞皞熙熙臻夫隆平之治不難矣臣濂旣序其事復再拜稽首而獻銘曰

皇帝建極先展孝思疏封母族自親而推錫爵維揚地邇帝畿立廟崇祀玄冕袞衣痛念宅兆卜之何墟閭師來告今在盱眙皇情悅豫繼以涕洟卽詔禮官汝往葺治母俾葬豎跳踉以嬉惟我揚王昔隸戎麾憐風蕩海糧絕阻饑天有顯相夢來紫衣挾以登舟神力所持易死爲生壽躋期頤積累深長未究厥施乃毓聖女茂衍皇支蘿蔔肇開鴻祚巍巍日照月臨風行電馳自流徂源功亦有歸無德弗酬典禮可稽聿昭化原扶植政基以廣孝治以惇民彝津里之鎮王靈所依於昭萬年視此銘詩

大明故王府參軍追封縉雲郡伯胡公神道碑銘

上天既革元命。皇帝定鼎金陵。遣大將下浙河東諸郡。而婺衢處三州相繼平。時當草昧之初。上思得智勇之才用之。於是處之胡公仲淵躍然而起。以自赴功名之會。入陪廟算。出鎮鄉邦。言聽計從。寵遇無比。浙東之俊彥攀龍鱗而附鳳翼者。皆自公始。若公者可謂卓犖不羣之士矣。公諱深。仲淵其字也。系出漢安定。宋初有諱棟者。自潤之丹陽遷處之龍泉。因家焉。棟生璠。璠生文虎。文虎生竦。竦生晟。晟生滂。滂生衢州錄事參軍松。年松生鄉貢進士應辰。應辰生溫州樂清令璿。璿生江南西路兵馬都監。見大則公之曾祖父也。大父諱堂。父諱鉉。仕元爲征東行中書省左右司員外郎。母趙氏。生三子。公其長也。次曰潭。曰海。繼母季氏。生一子。曰溥。員外府君早歲宦遊京師。公始十齡。而大母季夫人與母夫人相繼亡。公侍大父奉繼母撫幼弟。艱難刻厲。以自植立。未弱冠。走京師。侍府君適府君使高麗。復往候焉。居久之。府君棄捐館舍。公崎嶇萬里。奉柩南還。舟行一日。泊大崖下。夜夢神語之曰。此崖且崩。宜急避。驚覺。趣移舟。俄頃大風雨至。崖果崩。聲如萬雷。既歸。葬於縣北之圍源。遂廬於墓左。悉取諸子百氏天官地志兵謀術數。醫藥卜筮老釋之書。而研究之。發爲文辭。操筆可立就。當元之季。江淮倅擾。蔓延閩浙間。盜由建之浦城。松溪入龍泉。公嘆曰。浙水東地氣白矣。禍將及。乃集鄉兵結寨於湖山。已而處州之民相聚爲盜。江浙行中書省調萬戶石抹公宜孫戍處州。辟公參謀軍事。檄所隸諸縣募壯士爲軍。浹日間得數千。公引之屯竹口。下令賊中曰。爾皆良民也。因驅迫故爲亂。棄仗卽仍良民矣。賊以公長者。其言不欺。盡毀旗械。肉袒請降。溫州戍卒韓虎陳安國殺主帥據城叛。行省命宣慰使恩寧普公討之道。由處州與公語意合。帥府

軍事復辟公參謀之。公曰：溫州叛者，唯二人耳。若破其城，玉石必俱焚。如平民何？遣辯士入城說其黨曰：韓虎悖逆亂常。今王師四集，旦夕且攻城。雖金湯無不破者，若輩胡爲與賊守？自取作虧粉耶？將軍未忍卽加兵，苟能去逆效順，悉從原宥，或稔惡不悛，城一破悔無及矣。其黨相向泣曰：吾屬自度旦暮鬼耳，儻獲復生，敢不唯命？乃殺韓虎等以城降。溫城瀕海，民以漁爲業。時城閉者三月，民病甚。公請發粟賑之，驅呼之聲載于道路。宣慰欲列公功聞于朝，公辭。旣而宣慰以行省參政總兵征鄱陽，復邀公俱行。戎務無鉅細，悉屬之。青田潘惟賢聚衆爲叛，龍泉長吏聞風遁去，賊遂焚縣治。公之師曰王毅先生，與門子弟集義兵搗退之。里中惡少年疾其功，因害先生。公在鄱陽馳而歸，執害先生者盡殲之。縉雲之黃邨、松陽之白巖、遂昌之大社、麗水之浮雲、泉溪無賴之氓，咸爲盜根，勢蟠結不可禦。行省丞相康里公承制以石抹公爲行樞密院判官，分院鎮處州。旣至，假公分院行軍都事，統兵討麗水、攻泉溪賊寨，拔之。未幾，又平浮雲、白巖，賊懼，遂來降。縉雲盜亦就平。乃移師攻遂昌，賊酋周天覺、方友元領其精銳出迎敵。公望見笑曰：賊若堅守不出，未易卽殄滅。今茲之來，豈非天授我乎？分部諸校以正陣接戰，以奇兵夾擊之。別遣遊軍入山，搜其伏匿，比戰，賊三面受擊，輒大敗，斬首數千級，生擒八百人。獲方友元梟之，乘勝直攻大社。周天覺降，復移兵討青田。賊黨金德安殺潘惟賢兄弟以降。先是，國兵取浙東，婺衢旣下，獨處州爲石抹公所守，不降。歲己亥，今上皇帝遣僉樞密院事胡公大海由間道取處州。石抹公出戰敗北，大軍入城，而分兵取屬邑未附者。公時以假元帥統龍泉慶元松陽遂昌四縣兵，欲閉關爲拒守計。四縣士民咸請於公。

願內附以全民命。且曰君治兵殆十年勤勞亦至矣而朝廷無一命之錫國家負君君何負於國哉公知時事已去乃解甲出見胡公四縣因不受兵上素聞公名召至南京待以殊禮居亡何擢中書左司員外郎上日與公論天下事公有言未嘗不稱善也遂詔公還處州招集舊所部將校兵卒以從征西上既平江西命公以親軍指揮守吉安會浙東苗軍爲變婺守將既被害而處城亦爲所據上遣公復處州比至城已復除公浙東行省左右司郎中總制處州軍民事郭郭甫被兵民物凋瘵而山寇乘間竊發人情未固公隨方招捕凡首惡卽誅之然猶慮戍兵之寡日募之獲勝卒萬餘人諗於衆曰兵少不足禦敵師衆又無以食之奈何衆皆曰養兵所以衛民苟不爲禦備計子女玉帛且不保況於食乎公乃因民之產以權宜增賦之沿海軍素驕橫及是以復城有功橫益甚公擇其尤無良者斬之衆乃驚服江西食東浙鹽而有司十分稅一販者鮮至公請以二十分收一商賈遂通城南枕大溪浮橋之廢已久橋隄當水之衝亦爲所齧蝕幾盡公卽上流比舟爲梁以濟行者州學敝壞講舍僅存用以貯官粟公撤而新之薦新進士吳世昌爲郡文學以司教事城中民庶多爲戎士所據混淆而處公度閒曠之地建營屋數十區使別居之縉雲官田其稅額甚重執里役者恆以私粟代價公以新沒入之田實其數其害乃除諸暨守將謝再興叛兵犯東陽平章李公文忠擊走之公引兵爲援建議以爲諸暨浙東藩障若諸暨不守則衢處不支矣乃度地去諸暨六十里並五指岩新築一城不旬日而成樓櫓濠柵靡不畢備上聞諸暨叛遣使來議別爲城守計暨至城已完上嘆賞不已其後浙西將李伯貞大舉入寇兵號二十萬頓城下城堅不可

攻敗績而去。上念公立城功，以名馬賜之。青田之蘆茨地接閩徼，人素獵悍，葉仲賢恃其險，屢服屢叛。乘我師在外，復來寇。公怒，還軍深入，禽其渠魁，少壯者皆籍爲兵。二十年，逋誅之盜，一旦就平。溫州方明善，攻我平陽。公出偏師復之，并復瑞安所侵地，而親統正軍攻溫州。明善勢蹙，與其仲父國珍議納歲幣。詔公還師，明善繼以鹽若干來進貢。上命處州易銀以入內藏。上怒銀色惡，責守令使償。公曰：「此吾過也。守令祿薄，何能償？」乃售龍泉田以銀九百兩代輸。公尋入覲，上欲留公且柄用之，以邊事未輯，願還守外。上時已卽王位，乃擢王府參軍，仍總制處州等翼。陞辭上諭之曰：「俟閩浙盡平，當擢汝中書矣。」福建陳有定擾邊，公奉命征之，遂取建之浦城，而崇安建陽二縣亦下。上賜以所乘駿馬，建之守將阮德柔兵四萬屯錦江，實出我師後。公還兵擊之，破其寨柵，有定大懼，帥銳卒亟圍我營。公突陣與決戰，馬蹶，因被斃。有定既得公，頗禮遇之。公具道天子仁聖，四海歸心，羣雄樂爲之用，且援資融歸漢故事，撼之。有定初無殺公意，會元使至，督迫之，遂遇害於福州。實歲乙巳之春也。享年五十有二。上痛悼不已，命使者即其家祭之。復詔中書議加卹典，追封縉雲郡伯。有爵而無階官職勳者，有司之制未備也。公天資穎拔，智識絕倫，藝術弗學則已，學之則無不精。性倜儻好施予，賢士有貧乏，傾橐以周之，弗吝也。其守鄉郡凡五載，馭衆一以寬厚，用兵十餘年，未嘗妄戮一人。恩惠在人甚多，故其歿也，聞者莫不流涕。鄉人爲立祠宇祀之。公元配同里項氏。先五年卒，生二子，長曰楨。宣武將軍僉處州衛指揮使司事，次曰樞。女一人，適章存厚，繼室滌陽楊氏。前中書左司郎中元杲女弟也。公旣沒之二年，楨等乃刻木爲象，具衣冠以葬。實祔於望源之

左葬已來徵濂爲之文。昔濂侍上於白虎殿，忽顧問曰：「胡深何如人？」濂對曰：「文武才也。」上曰：「誠如卿言。」浙東一障，朕方賴之。則上所以倚公者至矣。然公亦知上委任之深，而無以圖報。嘗謂人曰：「區區承詔鎮處城，皇靈覆育，幸已寧謐。誓將挈全閩之地，以入版圖。庶展犬馬之微衷也。奈何功業未就，而死及之。其非命也。」夫濂辱公交者五六春秋，見公酒酣耳熱，指揮三軍，而雄姿奮揚，不可遏。及與縉紳之流論文評詩，則歛然布衣書生也。濂未嘗不服其勇而愛其謙。今公不可作矣，敢用備著公之事，揭諸墓門，以告世之知公者。銘曰：

洸洸胡公，萬人之英。一劍橫空，莫之敢撄。浙河之東，地氣盡白。此爲兵徵，見於龜莢。爾衆荷戈，來入我堡。寘爾枕席，拔爾水火。公師如風，鼠寇如雲。一鼓之餘，散爲埃塵。節鉞出鎮，涉歷五年。桴鼓不驚，雞犬晏然。誰登叛人，陷我諸暨。公遷其城，寇至輒敗。皇用嘉錫，使車絡繹。天閑龍馬，賜公弗惜。公感主知，酣歌慨慷。誓提八閩，以歸職方。王師所屆，勢如破竹。天未厭亂，三軍夜哭。公材孔多，公志弗阿。月出如赭，公命奈何。丈夫之澤，流於異方。孰能行之，父母之邦。匪公之臨，千里枯骲。公雖止斯，庶亦無愧。廟堂有嚴肖像其中，精靈翕然，上與天通。括蒼之山，其翠欲滴。公名配之，有永無斁。

中順大夫禮部侍郎曾公神道碑銘有序

治古之時，非惟道德純一，而政教脩明。至於文學之彥，亦精贍宏博，足以爲經濟之用。蓋自童卯之始，十四經之文，晝以歲月期於默記，又推之於遷固、范曄諸書，豈直覽之其默記亦如經，基本既正，而後徧觀

歷代之史察其得失稽其異同會其綱紀知識益且至矣而又參於秦漢以來之子書古今譏定之集錄探幽索微使無遁情於是道德性命之奧以至天文地理禮樂兵刑封建郊祀職官選舉學校財用貢賦戶口征役之屬無所不詣其極或廟堂之上有所建議必旁引曲證以白其疑不翹指諸掌之易也自貢舉法行學者知以摘經擬題爲志其所最切者唯四子一經之箋是鑽是窺餘則漫不加省與之交談兩目瞪然視舌本強不能對嗚呼一物不知儒者所恥孰謂如是之學其能有以濟世哉此濂銘亡友曾公之墓憤激於中而復繼之永慨也公諱魯字得之曾其氏也孔門弟子鄭公五十七代孫其居新塗吉陽里者已久世裔之傳與夫轉徙之詳昔以著於公之先墓茲不重載曾大父兼善宋贈大理評寺祖天麒宋宣教郎軍器監主簿父順元韶州路儒學教授妣劉氏公年七歲能暗誦九經一字弗遺奉禮郎簡君正理欲以神童舉於朝其父力止之及齒稍長取三史日記之尋及其餘數千年間國體治亂人材忠佞制度沿革咸能言之有叩之者如山川出雲層見疊敷杳莫察其端倪公殊不以爲足所藏子集勸至數百家各攬其精而掇其華聞有僻書隱牒不憚道路之遠必購得之旣得必篝燈讀之達旦不寐發爲辭章龐蔚炳朗毅然有不可奪之氣廬陵劉提舉岳中與之語連日夜弗休嘆曰不意後生中能至於斯也其將以文鳴乎杜內翰鄉之丈人行也公負笈從之游益充拓其所未至寤疑辨惑惟日不足遂以博極羣書稱於時公猶謂未要於至道述長書一通謁虞文靖公集於臨川虞公大悅曰昔程子與張敬夫年十六七脫然有志聖賢之道子能如是復何讓古人公年蓋十九矣由是益潛心濂洛關閩之學分別義

理密如蠶絲牛毛而尤愛吳文正公激之書。吳公亦居臨川其著書滿家無大無小。公一一訪獲之玩繹未嘗釋手。久之充然有得盤桓林泉以道自娛若將終身焉。至正壬辰天下大亂州縣所在繹騷。公召里諸豪集健兒持兵以保障乎一方。仍椎牛釀酒開陳逆順禍福言甚剴切衆皆聳耳而聽卒無敢犯非義者人號曰君子鄉及入國朝有詔纂脩元史勒成一代之典。遣使者起公于家公贊決部居補苴罅漏者不一而足其功爲最多。史成上坐端門召諸史臣有白金束帛之賜公居其首焉。公將乞身還山會朝廷開局編類禮書輿論以老成之士無踰於公者共堅留之議禮之家有如聚訟自古難定於一。公當羣言沸騰之中揚言曰某禮宜據某書則是從某說則非有不服者爭相辨詰公歷舉傳記答之各心醉而去。俄選入儀曹爲祠部主事階承事郎時洪武二年十二月也常忠武王薨高麗王遣使來祭公索其文觀之使者斬不與公不可使者不得已出之外則襲以金龍黃帕內則不書洪武之號公責之曰龍帕固疑誤用若納貢稱藩而不奉正朔君臣之義果安在耶使者頓首謝過皆命易去之乃已安南來貢主客曹已受其表將入見公取其副覽之其王乃陳叔明公曰前王陳日熒爾今驟更名必有以也亟白尙書詰之使者不敢諱蓋日熒爲叔明所逼而死遂篡其位中心懷悞故託脩貢以覩朝廷之意上聞之曰島㠭何狡猾如此卻其貢不受五年二月上問丞相曰曾魯在禮部今何職耶對曰不過主事爾卽日超六階拜中順大夫禮部侍郎公以順字犯父諱辭就朝請下階吏部以國法有定不之許僂巨入寇戍將每捕獲之上憫其無知命儒臣草詔歸其俘公之所譏有中國一視同仁之語上悅曰頃觀陶凱文已起人意。

今魯復如此文運庶其昌乎。凱禮部尙書也。八月奉旨考京畿鄉試入院之後忽吐血一升公猶力疾閱卷不息。自是遂奄奄不振。九月膏露降鍾山。羣臣咸見諸咏歌。獨公譏賦以進。十月上將郊祀出宿齋宮。命取諸作使侍臣更番誦之。至公獨曰此曾魯作耶。援據既精鋪敍有法豈新進之可驟至哉。十有一月疾逾篤。上章乞骸骨。甚至中書以聞。上惻然許之。十有二月辛卯歸舟至南昌。公謂次子圭曰吾命止明日不能至家矣。然吾以一介韋布之士受國寵恩位躋法從又得守正而斃死復何憾所憾者不見二孫之成立也。卽趣具輶翰爲書戒之。壬辰次石岐潭果歛衽而逝。距家纔兩驛爾。內申至故居丁酉始具棺殮擇地於縣南屏山之陽。以六年某月某甲子祔葬九世祖高安府君之塋。從治命也。公蓄德熙和人近之者溫如春風。不見忿戾之色。然其人則山澤之癯身退然若不勝衣。未嘗有所矯飾。其處家也。事親克孝。父喪哀毀致疾。踰年而後能起。已而二兄諸姪相繼捐館。公杖決經紀凶事。三年間葬十餘喪。且撫存其孤惄。惟恐或失其所。平生輕財仗義。喜周人之急。四方賓客日登其門。公倒屣迎之了無倦容。嘗一試江西鄉闈。有司寘諸乙榜。人爲不平。而公亦澹如也。其出仕也。精白一心。有知無不爲。凡典禮涉於制度者必經公損益而後定。雖古者吏牘之繁簡署字之上下人所不能知。公獨稽諸書以爲決。公誠所謂濟世之學者非邪。公屬文不喜留稿。其徒雖有所輯錄。猶未成書。其自著書有六一居士集正訛。南豐類稿辨誤藏於家。他咸未脫稿。當公修元史時。濂實爲總裁。及入南宮又有僚友之好。故相知號爲最深。共坐官齋。更析互辨。每至夜分。嘆末學之空虛。傷古道之寥落。又復相視。冁然一笑。嚴陵徐尊生嘗有言曰。南

京有博學之士二人。一以舌爲筆。一以筆爲舌。其意蓋指公與濂。嗚呼。尊生過矣。濂也何人。而敢上儼於公哉。雖然。公未嘗欲棄濂也。相期他日幸歸休。必胥會焉。共成一書。庶可藉手以見前賢。公今不可作矣。故因銘墓之文。而屢興懷於治古之時也。世之讀者。必將深感焉。公讀書之室曰守約齋。學者遂稱爲守約先生。享年五十四歲。娶姁氏。先二十年卒。公再不納配。一榻蕭然。如山林枯槁之士。人難之。子男二人。長塾。今來請銘者。次卽圭出爲仲兄。後女一人。應真適劉奉孫二人。正龍夢龍銘曰。

氣化糾纏。人文昭宣。萬類斯甄。天設地施。一偶一奇。形聲相資。載藉繽紛。六藝攸尊。各闢其門。分枝
分葉。敷散爲千塗。混其精物。彌綸大邦。物采文章。有變有常。不生碩儒。孰軋其樞。孰苞其腴。玉筍
之陽。神珠吐芒。莫自翳藏。大明麗天。東帛箋箋。蒐羅俊賢。袞褒貶。寓於策書。輿論所孚。儀曹之
升。議禮稽經。日維烝烝。兮黼黻帝猷。上窺殷周。功在刪修。兮所積之訛。所發之深。開陽闔陰。兮正笏垂紳。
其色閭閻。邦之老臣。兮媚學躊躇。其中樗然。何翅霄淵。兮天胡降喪。一鑑之亡。四國之傷。兮其神上征。化
爲列星。寒光晶瑩。兮下射屏山。馬鬣桓桓。名在不刊。兮

四十二代天師正一嗣教護國闡祖通誠崇道弘德大真人張公神道碑銘有序

洪武丁巳冬十有二月五日。四十二代天師張公薨於龍虎山之私第。年甫四十有三。禮部尚書張籌卽
爲奏聞。皇上嗟悼者良久。且曰。朕欲命其偏祠五嶽。今方一至嵩山。何期大數止於斯耶。遂親製文一通。
遣前浙江行省參知政事安慶爲弔祭使。仍令其冢子宇初襲掌教事。戊午春二月十六日。宇初奉公冠

劍權厝南山先墓之次至十有二月某日卜宅兆於某而瘞之。字初恐遺德未能大白於世與羣弟子輯爲成書使張致和卽金華山中請銘神道之碑濂幸辱與公游義不可辭公諱正一字仲紀姓張氏信之貴溪人漢留文成侯四十六代孫也重紀至元乙亥夏六月十三日其父太玄真人坐而假寐忽見神人飛空而至曰余自華蓋山來至君家願見真人及覺而公生紫雲覆庭紅光滿室人以爲祥公年七歲雙目爛爛如巖下電容止異羣童後三歲太玄出游五岳名山指相傳雌雄劍及玉刻陽平治都功印曰龍星再集於亥吾兒當持此大振玄風太玄渡淮化去而公之仲父嗣德繼主其教仲父薨衆論咸屬於公公力讓仲父之子正言正言薨公始嗣其職實至正己亥之歲太玄之懸記至是始驗公陞廣筵開演道家玄旨四海學徒聞者聳然領解時天下大亂經錄祕而不傳者十年公乃啓黃書赤界紫素丹刻之文授其徒胡合真整比以行奉贊來受者川赴雲蒸劍失其一流落鄱陽李氏家夜生光恠公訪而合之辛丑上統大將親取江西公知天運有歸遂遣使者上牋述臣順之意乙巳公朝京師上一見悅曰瞳樞電轉法貌昂然眞漢天師苗裔也下詔褒美之錫燕者再兼有金繒之賜丙午復入覲京城士庶人求靈符者日以千百計侍史不能給閉關拒之乃相率毀關而入公叩齒集神濡毫篆鉅符投朝天宮井中人爭汲之須臾水皆竭見土弗止飲者疾瘳上嘉之令作亭井上號曰太乙泉及還山復詔中貴人賜以織文金衣仍下中書給驛券畀之以便朝覲洪武戊申上登大寶位建號改元公入賀錫燕於便殿中命撰制書授以正一教主嗣漢四十二代天師護國闡祖通誠崇道弘德大真人之號仍俾領道教事給以銀印

視二品設其僚佐曰贊教曰掌書久之陞辭而歸上御謹身殿從容謂曰卿乃祖天師有功於國所以家世與孔子並傳以迄於今卿宜體之以清靜無爲輔予至治則予汝嘉賜白金十二鎰新其宅第己酉春上召公入朝踰月承顧問者六錫燕者三三月十三日上將通誠於天帝致齋三日御袞冕服親署御名於章勅太常設樂手授於公俾咒而焚之禮成燕公於文樓羣弟子饗於別館復有金繪之賜庚戌夏上錄公之功特勅吏部改贈公父三十九代天師太玄輔化體仁應道大真人嗣成爲正一教主太玄弘化明成崇道大真人改封公母明慧慈順仙姑胡氏恭順慈惠淑靜玄君玄君時年八十朝野以爲榮是年秋上復召見問以鬼神情狀更給銀印壬子秋復頒制誥以寵之冬十有二月復召入覲癸丑春將還上命留弟子以司祕祝之事丙辰上遣使召公公忽先期而至上喜曰卿之來何與朕意相符邪明年之秋朕將遣使祠海嶽諸神卿當妙東清修之士與其偕來丁巳夏公率羣弟子汪弘仁等入覲錫燕午門之城樓上舉爵謂公曰卿宜罄此一觴勅內侍出御製歷代天師贊示公曰他日當書以賜卿翼日詔公從太師李韓公善長祠嵩山分遣重臣與公弟子代祠羣望自公而下賜衣各二襲楮幣有差旣還錫燕如初公自返故里志趣頗異常一日置酒與昆弟酣飲慨然嘆曰五嶽名山先子欲遊而不可得嵩山中峯乃吾祖得太清丹經之所今藉天子威靈幸一至焉曠曠景於層霄邈浮埃於浩劫吾志將有在矣君子疑其言未幾示以微疾端坐榻上屬弟子方從義曰吾無以報國家寵恩爾等宜左右我子孫以贊寧謐之化命取劍印授其子曰我家千五百年之傳在是汝其勉之死生數也吾之不死者其光赫赫四燭寰

瀛先天地不知其始後天地不知其終也。舉手作一圓象。嘿然而化。是夕大崖石崩。聲聞數十里。云公幼警敏。靈籙文祕之屬。皆不習而通。歲屢旱。禹步召風雷。精神達於冥渺。甘霖卽降。或有爲魑魅所憑者。授以片符。輒潛影不見。公憫兵戈疫癘之餘。沴氣不消。舉行玄壇。舊典修壇壝。建陰陽鼎而鍊度之。其徵驗尤夥。然其天性曠曠。潔而不縕。如超萬物之外。故以沖虛子自號。最愛佳山水。仙踪靈跡所在。必窮幽極深。動至累日忘返。當適意時。欲乘白鶴。與羣仙翱翔紫清之上。其於人間事。未嘗因此少輟。其奉玄君。備極孝養。暨歿。葬祭咸盡禮度。兵禍相仍。傾貲募人爲兵。以捍禦鄉井。人賴以安。公之玄裔。備見世家。茲不載。其曾祖父諱宗演。三十六代天師。演道靈應。沖和玄靜真人。妣周氏。某玄君。其大父諱與材。三十八代天師太素凝神廣道明德大真人。金紫光祿大夫。追封留國公。妣易氏。妙明慧應常靜玄君。其考妣則太玄真人與胡氏也。公字觀宇。娶盱江包氏。宋宏齋先生。恢之五世孫。子男子四人。長字初。卽今天師。穎悟有文學。人稱爲列仙之儒。近者入朝。上召見奉天殿。反覆諦視之。笑曰。絕類乃父。寵賚有加焉。次字清次。海鵬次勝佑。子女子二人。一歸鄱陽王岳。一在室。惟公生平神明之胄。簡素端凝。用道爲體。而膠轄游氛無自入。於念慮澄靜之久。天光自發。所以受知聖君。入朝京師。天寵使蕃。聲聞四達。至於死生之際。又能不動聲色。超然坐脫。如行者之返故廬。非真有道者。豈易致哉。是宜銘。銘曰。

天開日明。真人上升。周流九霄。駕輶作輶。卿雲英英。剛飈泠泠。絳節翠旛。恍其來迎。載稽玄裔。歲踰千齡。五綵交絢。玉笈金經。矧有劍印。奔星走霆。非人莫授。恐干鬼刑。華蓋神君。於焉降精。圓目青瞳。閃如電熒。

入朝帝京照耀殿庭進退有儀金衣霞襯帝曰俞哉爾方外臣輔朕鴻化凝真集神巍巍嵩山五岳中尊爾往代祠執禮如存庶集靈和以綏兆民皇用袞錫璽書金縉君臣遇合玄德之徵胡爲弗留飛神窈冥崩崖墜雷百里震驚圓光有赫四爛寰瀛在天爲清在地爲寧在人爲貞是謂三靈此乃道樞中黃之局公能守一精聚氣凝不死維神所蛻維形白鶴來歸遼東露零洞視萬古後天弗傾

元贈開府儀同三司上柱國錄軍國重事江西等處行中書省丞相追封咸寧王謚忠肅星吉公神道碑銘有序

今上皇帝旣有天下憫元忠肅公星吉死節之忠擢其一子昌官內廷遷監察御史俄超山東按察司副使昌將行詣濂泣曰先公薨於斬盜盜有義先公者具棺葬於斬水縣鳳凰山下家人弗聞知時兵未靖各守其境道阻不通昌微服跳走數千餘里瀕死者數矣遇今上克斬始獲至詢斬人啓棺北還以某年月日葬於某地而昌又獲祿食於朝皆上之至仁先公之遺德也先公之忠旣載在元史惟是墓道之碑未有刻文敢惟先生是請翌日濂以聞詔曰然星吉之忠朕實知之卿其勿辭乃考論其事曰謹按元贈開府儀同三司上柱國錄軍國重事江西等處行中書省丞相追封咸寧王謚忠肅星吉字吉甫河西人贈榮祿大夫河南江北等處行中書省平章政事上柱國追封秦國公改封雍王朵吉之曾孫贈榮祿大夫甘肅等處行中書省平章政事上柱國追封代國公改封涼王搠思吉朵兒只之孫贈榮祿大夫陝西等處行中書省平章政事上柱國追封趙國公改封邠王搠思吉之子其先三世以語言材藝事太祖憲

宗世宗爲怯烈馬赤譯諸國言後皆以公貴封王曾祖妣倫徹徹祖妣阿捏妣順祖皆從其夫封國爲夫人改封王夫人公兄弟六人於次爲三少齋然不可犯武宗時召見便殿襲怯烈馬赤事仁宗於潛邸仁宗卽位雅宜公久不改官英宗知公材延祐七年十二月授承直郎中尚監丞賜中統鈔千貫給校尉十人專道而行監尚御用物公謹持出納不可勢屈中官貴臣手無符勅絲毫不放英宗奇之至治二年二月遷右侍儀同修起居注命龍慶州達魯花赤脫歡以女妻公賜鈔三萬貫爲聘資寢得眷近公每侍側中外利害乘間進說無虛時泰定元年六月拜監察御史階奉直大夫丞相帖木迭兒紛更朝政御史大夫倒刺沙狼據中臺公奮章劾之朝廷凜然畏公三年七月陞朝列大夫引進使知侍儀事四年九月進侍儀使階朝請大夫文宗天歷二年八月拜江南行御史臺治書侍御史時大夫阿思兒蘭海涯有能聲公至萬口移譽於公大夫聲頓寢詔賜衣一襲上尊二朋鈔五千貫至順元年遷河東山西道肅政廉訪使薅姦剔穢煦其朽枯境內帖息三年二月復拜治書侍御史治陝西行臺未至召還同知中政院事六月改同知功德使司事順帝元統二年四月淮西江北道肅政廉訪使告闕僉擇其良以公爲之一道稱治明年徵拜大都路總管府達魯花赤輩轂之下權倖肆橫法滯不行公操其紀綱風追雷斷不問誰何姦宄帖然屏伏至元二年六月擢嘉議大夫大府卿大府近且貴莫敢鉤覈閹豎攘竊斂散無藉吏緣爲私公較擿隱蔽立簿計數吏畏若神將作院累歲乾沒綺繡之屬一萬五千縑悉責償之知崑山州事管某上書誣平江路總管道童詭報歲灾帝命公察情否初道童以廉正治其屬官不能堪故誣之且倚前

翰林學士阿魯灰爲援公驗得其狀以聞卒坐二人罪三臺交章薦公五年二月特授資善大夫都留守仍兼大府卿益虔於職談其美者日以上聞帝曰不可無旌以勸奉職者六年三月就加榮祿大夫未幾帝幸大府見公所爲條法精密諸藏皆盈有黃金束帶之賜時徽雨公立階下命侍臣取御服油衫加公身至正二年十二月陞宣徽院使四年二月改湖廣等處行中書省平章政事省控治五溪洞蠻土酋鹿馴家暴變幻百出每視省臣臧否以爲叛服公禁戢內兵勿擾其境布約施惠化其悍猾效貢奉職比於近縣十二月以中政院使召還六年六月賜金虎符轉海西遼東哈思罕等處抓捕鷹房怯伶口萬戶府達魯花赤十月遷將作院使後二月太府闕卿再入太府兼將作使階超光祿大夫七年十月遷宣政院使明年三月拜江南行臺御史大夫時承平日久官恬吏怠漫無倫紀公至擇剛明御史行十道糾劾貪邪疏拔冤滯憲司隸卒盤據爲虐者甚衆公下令屏斥之俾州縣之卒更月入直民歡樂之建康城北有宋王荊公墳寺僧世守既久視爲已有王氏孫伐山木僧執送官官將以盜論事上公公怒曰王氏山王氏孫伐之何謂盜耶卽歸山於王氏而遂僧出之秦檜裔孫斂民田羣訟不決公問寮屬曰檜是何人寮屬以姦臣對公閱檜傳大署其狀曰檜之誤國千載有餘戮矧茲遺胤敢爲民害盡斷其田於民公之明決皆此類湖東道僉事三寶注廉介不阿御史以私謁之不聽輒以事劾之章至公所公曰鴉敢擊鳳耶奏杖御史脫脫丞相與御史有連衡公十年五月移湖廣行省平章政事湖廣地並江北威順王寬徹不花田獵蹂踐稼穡起廣樂園萃名娼巨賈以罔利有司莫敢問公至求見王闔啓右扉入公引繩床向

中門坐。叱闢曰。吾受天子命爲藩大臣。烏可以小門入我闢。懼告王。乃啓中門。導公入。公拜謁畢。起言曰。王帝室之胄。與國同體。不爲天子養民。而獵野獸。悅婦女。以爲民病。臣竊爲王危之。王投几降坐。執公手。謝曰。非公不知此。悉罷其所爲。有胡僧持官府柄。橫甚。公捕其妻妾十有八人。籍於官。寘僧於法。由是民得吐氣。十一年。妖賊徐真一等起汝穎。蔓延湖湘間。勢甚熾。時武備久弛。公咨於衆。或以老將鄭萬戶有材略。對公乃令募士兵。繕城池。修戈甲。起部屬以禦賊事。賊聞有備。遣其黨千餘詣軍門降。公謂鄭曰。此誣也。鄭設伏受降誘。而殲之。縛其酋六百人獄。以俟命。會公召爲大司農平章。和尙受賊賂。繫鄭而釋其縛。縱之。明年正月。賊乘懈襲武昌。六百人自內爲應。城遂陷。城中人泣曰。星吉平章在吾屬。豈爲俘乎。公至都入見。陳致賊狀。帝喜。賜食及錢三萬貫。脫脫不悅。奏爲江西省平章政事。員外置吏卒。趣遣之官。至江東。有詔會浙西平章政事不顏帖木兒。南臺中丞蠻子海牙。守江州。時江州已破。江以西道不通。公開省太平。募人開道。持羽書走江西徵兵。未返而賊焰漸逼。調廣德軍寧國之兵僅一百五十人。賊號百萬。衆皆沮懼。公曰。勿憂。彼賊我王師。彼豈吾敵。乃貸富民財。募強壯爲兵。初行。臺募兵人給十五千無至者。公予五十千。三日從者逾二千人。公曰。可矣。卽擐甲。舟二千人。鼓行泝江而上。四月。與賊黨戰池州。斬首數萬。復其城。至魯港。威順王之兵亦至。士氣益張。賊據銅陵。拔柵夜遁去。又復銅陵。蒐其黨得二千餘。盡戮之。復遣裨將陸行。遇賊白馬灣。又敗之。賊走淮西。公部分諸將卒。兵躡其後。及於白湄。賊窮列陳迎戰。公麾左右策馬雜射。薄其軍。擒僞相周驥。賊潰不能列。俘其衆五千。奪舟六百艘。乘勝奔擊之。賊溺死。

者蔽江江水爲白於是道稍無阻已而賊擾池公率衆至池遇五游騎於苦竹嶺斬其二鞠賊安在聞其衆三百屯貴池襲之散去復其邑賊復攻陷石埭殺尉公夜趨之賊陳其衆三千於縣西岳溪橋有三酋一乘驢二躍馬突前挑戰乘驢賊驍勇無敵軍中常畏之公引弓射之應弦而仆再發再斃二酋後師乘之賊棄城走其散卒千餘焚掠縣西鄉公復追出境賊忽將舟師二百艘順流來攻公命萬戶王惟恭禦之戰方酣麾舴艋從旁橫擊賊破走乘勝進望江清水灘居三日偵者告賊舟四百順風引帆直指我軍諸將失色公曰無傷吾有以勝之乃偃旗伏橫港中風急水駛賊舟不得泊奄忽電過過且盡命舉旗掣帆鼓譟出其後賊驚駭不能弓官軍奮擊遂敗之擒卒二百獲其舟艦器械甚衆進克建德縣時賊久圍安慶聞其黨敗而蠻子海牙亦至焚營解去公且行且戰復湖口及江州賊巢據彭澤公欲攻之而江州倉無一日糧乃諭民輸財賚士卒俾惟恭守小孤山而自駐番陽口扼江湖要衝以圖恢復然亂已久湖廣江浙多敗江西亦無援助者轉戰六百餘所將兵日衰耗困疲財粟亦且殫匱或請去就食東南圖再舉公曰吾受命守江西此江西地也死則死此去將何之九月二十日賊知公兵食俱竭帥大舶載葦蔽江而下杜上下流縱火夾攻公麾兵殊死戰死且盡從子伯不花將親兵數千人戰亦死公猶堅坐大呼曰殺賊殺賊俄而賊射公中目仆舟中賊素識公名不忍害輿置密室中明日少蘇賊饋食公臥叱去或以刀脅公降公罵曰狂賊我國之大臣恨不能殺爾而爲爾獲命也何謂降爲大罵不已賊終不敢害環卒守公凡不食九日忽自力起北面再拜曰臣力竭不能報國敢不死以辱命言畢而絕時十二年九月

二十九日也。年五十有七。卒後二年。監察御史嶢嶢等請褒其義。乃贈今官。而謚忠肅云。公先娶卽脫歡女。諱奴倫。生一子而卒。後娶郭氏。中書平章政事不花之女。俱封趙國夫人。子男五人。曰刺哈咱。識理。公卒後。特授榮祿大夫。利國監大卿。曰答兒麻。八大中大夫。僉遼陽行樞密院事。其三卽吉昌。初名達爾麻。識里。上賜今名。曰寶山。曰寶座。女一人。濂昔論次元史。未嘗不歎其敗亡之易。由於內外壅絕。將相非人。使然也。當亂之始興。誠得數萬之兵。使一猛士將之。可立見其撲滅。而顧依違不斷。養致大釁。其中有足任如公者。又卒俾之孤危無援。不足以成功。豈非自致哉。惟公忠義果敢。出於天性。歷踐要職。聲績彰明。提千百未試之卒。轉戰湖江間。復城破邑。懾敵人之膽。雖勢孤力微。大功不竟。然忠義之氣。猶足以立萬世之防範。使亂臣賊子懼。宜乎皇上褒其後人。而以銘命濂也。其辭曰。

朔河之西。正氣烈烈。摩邊日月。乃生英傑。其人謂何。爲忠肅公。偉貌長髯。猶人中龍。當元盛時。出入禁闥。一志小心。不自矜伐。歷事三宗。登於顯融。正色厲言。以折姦兇。旣司行臺。亦尹京邑。貪邪宵遁。鬼神晝泣。湖湘之間。名王所都。納貨掄珠。烝黎告瘡。公聞盛額。盛服往謁。以笏畫地。再拜辨說。弛其嚴威。謝以巽辭。予實無良。非公不知。盛極而弛。擊生釁起。帕額持戈。蔓延千里。公駭而咨。聘帥與謀。始剪始屠。天子召予。匹馬北馳。狐鼠相賀。大城巖巖。一蹴而破。民泣且號。吾實不辰。公如在斯。豈爲盜人。當亡載詢。亂實誰致。稽首告言。權臣喪氣。公喪其氣。彼斥公身。朝辭暮行。禦魑魅羣。公曰。予家世承國恩。先臣在天。敢負吾君。我兵二千。以義爲勇。盜雖如林。逆不能衆。旣復池陽。遂徇銅陵。呼聲如雷。江水晝凝。左馘右擒。轉戰日亟。

扼江湖咽以掃南極氣吞逆難奈力之痛孰謂猛虎制於羣狐人或謂公盍往他所公曰受命死則於此烈焰燭雲勢無全軍志在誅巨罵聲益振羣酋羅拜來饋飲食叱之不御以死報國公死者身不死者名相贈王封以媿苟生豈惟當時愈久愈著元廟旣躉公尙有子公子克孝天子是庸匪惟私公以勸盡忠雖公至忠天子至仁刻辭豐碑垂訓萬年

毛公神道碑

奉國將軍僉大都督府事毛驥來謂濂曰先公以至正辛丑正月朔日棄遺諸孤某月某日遂畢窀穸之禮迄今已十八春秋淳蒙天寵之加賚及泉壤而墓上之石未有銘辭大懼無以昭君賜而示子孫願爲備書其故俾刻焉按狀公諱麒字國祥姓毛氏世居鳳陽定遠縣之昌義鄉生平負英氣多謀略人恆敬之壬辰之夏汝潁兵大起所在郡縣皆相挺爲亂今上皇帝龍興臨濠憫生民之塗炭持三尺劍出而救之一呼之間從者數萬直趨定遠之池河初縣之大姓陳氏與公謀招健兒爲兵屯營其地挾縣尹某爲帥作保障計聞大軍且至皆棄妻孥作風雨散去公獨扶尹共詣轅門款附上遙見之令左右問曰爾爲何人對曰定遠尹也扶尹者何人對曰縣民毛麒也上壯公所爲乃召之前指謂侍臣曰衆皆潰而麒獨降非有識者邪於是寵遇優渥朝夕俾公侍膳與共計征討之事健兒聞公在幕府亦先後出降上取滁州擢公行軍總管府經歷司其倉廩兼掌晨昏歷以鎮將帥之失佐者未幾取和州軍威益振上以建國之初唯兵食最急仍命公護滁州倉乃帥師渡長江太平望風乞降遂開江南行中書省徵公還陞爲郎

中當是時上之左右唯公及太師李韓公尤被簡任凡政令之敷布餰餉之轉輸羽檄之交馳皆二公相與協贊之及建康下遂定鼎焉分道帥師日以獻捷聞復陞公爲參議官戊戌冬上親征婺州公實權署中書省事小大庶政咸出公營度人情煦合文武無間言上將大委任之而公以病告上臨其家坐榻上執手問所苦且勉其善自愛如是者凡三計聞宸衷憫悼錫贈有加焉且詔參軍胡深選葬地於江寧虎頭山及靈車就塗上復躬御翰墨作文一通御鎮淮橋而祭慟哭良久直至處所視其下棺始還公之子驤時備宿衛上念公弗置俾驤就儒師學親自訓督之命爲飛熊衛管軍千戶轉振武羽林二衛驤感上恩自謂千載一時夙夜思立身揚名以報國顯親爲務會大兵征漢鄂定襄沔下吳興俱從征有功洪武元年上郊皇天卽帝位國號大明在廷之臣皆驗勳進官擢驤宣武將軍僉羽林左衛親軍指揮使司事仍追封公西河郡伯封公妻周氏西河郡君大將軍徐魏公奉詔征中原而驤又從行直搗燕薊元君出奔天下於是大定論功行賞陞驤懷遠將軍同知親軍指揮使司事世襲其職得推恩二代時重定封贈例司封據令更贈公懷遠將軍同知親軍指揮使司事周氏封淑人公父文政贈明威將軍親軍指揮使司副使母朱氏贈德人驤室劉氏先封西河郡君至是亦更封淑人已而驤進官羽林左衛親軍指揮使階昭勇將軍滕州段士雄反驤帥師討平之倭奴入寇浙東沿海郡縣皆失寧驤會浙江太倉諸軍捕斬五百餘級獲海舟一十二艘倭奴遠遁入奏奉天殿上大悅曾未幾何驤復超奉國將軍僉大都督府事加贈公僉大都督府事階奉國將軍而明威公亦加昭勇將軍羽林左衛親軍指揮使朱氏加

淑人周氏劉氏皆夫人繼室張氏亦封夫人公生子九人驤其長也次曰駿某階羽林衛千戶所鎮撫曰駒某階金吾左衛千戶所鎮撫曰某曰某曰某曰某曰某女三人二先卒一嫁宿衛舍人沈俊孫六人曰振武曰應孫曰承安曰鎖住曰東平保曰寶慶嗚呼天造草昧之時六合雄爭未知鹿入誰手昧者往往失於所憑依而公獨能炳於幾先識真主於龍飛之初扶攜臣服獻計宣勞以佐興王之運豈非豪傑之士哉及乎神武四達方域內附皇上崇德報功之心惟恐有弗及故當時開國元勳無不分茅胙土鐵券金書傳及來裔奈何公之早世不得盡其才而與之並其命也邪雖然驤之雄略超羣蓋奇勳出入扈從上簡帝心爵位之顯融贈卹之便蕃尙方新而未艾也公雖沒亦可以無憾矣銘曰

猗歟毛公沈毅而雄元運將終亂如聚讐公奮而興使民爲兵執旗一呼從者如星我州我閭我保障之俾全其生寧顧我私上天厭亂特命真人驅雷駕雲廓清妖氛公聞曰噫天胡可違附鳳攀龍茲惟其時我志先定敢徇輿情上謁轅門稽首以迎上嘉其忠寵賚日優談笑折衝帷幄運籌羽檄星馳饋餉弗遺是馳是驅以壯我王師飛渡大江軍威洸洸達於四方無敵不降自參戎闈遂贊中書拾級而陞漸見赫熹卉木方榮嚴霜折之大火始然河水滅之天若假年勞烈孰侔貂蟬朱紱豈不公侯命也止斯人其奈何中外聞之孰不嘆嗟公雖云亡有子慨慷出入禁庭侍衛帝傍勳名日崇貳典日殷天光照臨輝輝煌難逢者時不朽者名名著實并登諸汗青莫堅匪石以礪以磨史官造銘永鎮山阿

元故國子祭酒孔公神道碑

堯舜禹湯文武及孔子德皆聖人惟孔子不得位而功最盛天於恆人有一善且昌其後昆況德充天地功施萬世而身不食其報者乎堯舜禹湯文武皆王天下故子孫受其祉有限孔子無位故餘慶遺澤被其子孫者無窮自斯民之生未有若孔子之德而無位者也亦未有孔子之傳世久遠而襲爲封君者也嗚呼天之報聖人其在茲乎公諱克堅字環夫世家魯之曲阜孔子五十五代孫也曾祖曰之厚贈大夫濟寧路總管輕車都尉祖曰浣累贈通議大夫禮部尙書上輕車都尉皆追封魯郡侯父曰思晦嘉議大夫襲封衍聖公累贈通奉大夫河南江北等處行中書省參知政事護軍追封魯郡公謚文肅曾祖妣女真氏祖妣李氏妣張氏皆追封魯郡夫人公少廓達通敏日誦千餘言始冠遊學成均通春秋左氏傳文肅公薨襲封衍聖公階嘉議大夫元重紀至元五年上疏請修飾廟像順帝可其奏賜山東歷日錢之半給其費命監察御史族人思立持楮幣二萬五千緡勒碑以紀成績至正六年中書謂公爵與階不稱奏陞之制授中奉大夫易銅章以銀十五年平章政事達世帖木爾薦公明習禮學徵爲同知太常禮儀院事以子希學襲公爵是年冬帝親郊公攝太常使盛服襜然升降有容觀者稱爲達禮御史大夫雪言公才宜近侍左右拜中臺治書侍御史公辭歸明年拜山東道肅政廉訪使既受詔復辭會山東兵亂公率家人北行次藁城丞相賀太平奏召公爲集賢直學士希學爲祕書卿遣使者卽藁城起之公至燕都處盜毛貴犯畿甸且逼廷議棄燕遷關中公曰天子當與社稷宗廟俱爲存亡烏可棄而他之今勤王之兵頗衆與之決戰盜可平也如公言盜果敗去十九年遷禮部尙書知貢舉時四方士避亂多集都邑公

請設流寓科以取之。是年冬擢陝西行臺侍御史。李思齊及察罕帖木兒二軍爭秦隴相攻。朝廷不能制。陝西行省丞相帖里帖木爾納思齊降。將命張良弼禦之。公及中丞袁渙諍曰：不可。二軍不敢舉兵犯奉元。豈其力不足哉？特以無名耳。今納其叛將而出兵禦之。是引虎使噬也。丞相不從。渙亦被劾去。公怒曰：謀之不善。亂且至矣。遂自効而歸。月餘。二軍及良弼戰於鹿臺。奉元果陷。二十二年除國子祭酒。帝賜上尊。太子書大成殿額以賜。公以世亂不樂居位。竟謝病歸闕里。營別業城南以居。後起公爲集賢學士資善大夫。不就。復以公爲山東廉訪使。卒不起。二十八年皇上手詔趣公入覲。待以賓禮而不名。賜以廩祿。不煩以職。郊祀必致脯肉。撫勞甚至。洪武三年春以疾告遣。中使存問。疾篤。詔還公於家。給驛以行。賜白金百兩。文綺八端。他錢物稱是。三月二十八日次下邳。新安驛薨於舟中。壽五十有五。希學奉喪歸。以六月十三日葬於孔林。去孔子墓若干步。公寬厚樂易。事親有禮。遇族黨有恩。與人交不爲掩覆。計度一以誠信。豐厚美髯。容止甚都。順帝以福人稱之。公娶張氏。濟寧路總管子仁女。封魯郡太夫人。丈夫子九人。長卽希學。次希說。希範。希進。希麟。希鳳。希順。希尹。皆元國子生。希贊其季也。女一人。適某某孫男九人。曰証。曰某某女五人。希學今資善大夫。襲封衍聖公。每歲朝正於京師。上寵錫之甚厚。以袁渙狀來請。曰：先公沒今十年。而墓道之石無文以刻。恐休德不聞於來世人。其謂何？濂嘗獲識公。且與希學善。雖老矣。其忍不銘。銘曰：

天命大聖爲萬世師廓幽昭潛。兩施日輝功加堯舜。位則不有斂其遺澤以昌厥後。歷年二千有興有亡。

五十餘世。封褒相望。自侯而公。愈遠彌貴。桓圭袞衣肅將祀事。惟公紹休道大且文。人曰休哉。聖師之孫。入爲秩宗。左禮右樂。格於幽明。上下尤若亂兵趨燕。宗社震驚。君臣合謀棄而西遷。公曰不然。君死社稷。以正伐亂。勝不以力。王師焞焞。如虎如貔。盜遁難巨。公實啓之。關陝之間。將驕皆噬。彼謀不臧。以水止潰。公謂元戎。世方興亂。無失厥防。以速其叛。言臧不從。不臧是爲禍。將迨身云何。弗歸。璽書迎拜。俾掌邦教。大訓宏謨。敷聖之道。土宇日墮。位其可居。退修於家。琴瑟詩書。皇明御極。取聖爲則。陟降帝庭。禮儀有翼。生享其榮。死篤其承。云誰致然。聖澤休明。惟聖之澤。如山如川。有址有源。以永厥傳。繼聖惟賢。守位惟德。昭績垂聲。後嗣是式。

墓碑

東丘郡侯花公墓碑

皇上渡江之六年庚子夏閏五月癸酉僞漢主陳友諒以舟師入寇。圍太平行樞密院判花公率麾下三千餘人結陣迎戰三日。賊不得入。乙亥城中乏食。公士馬憊。城陷。賊縛公急。公怒。奮身大呼。縛盡解。起奪守者刀。殺五六人。罵曰。虜非吾主敵也。曷不趣降。賊怒。碎公首縛於舟檣。衆射之。公至死罵賊不少變。已而賊犯龍江。上命諸將力戰。賊敗遁去。後五年甲辰。上卽吳王位。追封公東丘郡侯。又十六年。其子僉。水軍左衛指揮司事。煥泣曰。先公歿今二十年。無文銘於神道。竊恐忠烈不白於後世。敢請。惟公勳業始卒。宜載國史。余嘗待罪太史氏。不敢以耄辭。公諱雲。姓花氏。世爲懷遠人。自考以上姓名皆亡。莫知遷徙世

次然皆不顯公少孤隨母嫁張氏貌偉而黑驍勇絕人儕輩畏服之歲癸巳仗劍謁上於臨濠上奇其材力俾將兵略地所至輒克破懷遠城口擣其帥以歸進攻全椒拔之羣寇據繆家寨公俟夜襲之寇散走上將取滁州單騎前行遇賊數千人於道拔劍躍馬衝其陣而過賊驚曰此黑將軍勇甚不可與爭鋒兵既至遂克滁甲午從上取和州得卒三百以功援管勾明年乙未率所部先渡江上克太平以公忠勇可信任命宿衛左右丙申上破集慶公得兵千人陞總管徇鎮江丹陽丹徒金壇諸縣皆下之過馬馱沙劇盜數百遮道索戰公且行且鬪三日夜皆禽殺之授前部先鋒攻常州拔其城駐守牛唐營夏六月立行樞密院於太平遂拜公院判階安遠大將軍丁酉春正月克常熟州獲卒萬餘命公將之秋七月以兵三千之寧國陷山澤中者八日羣盜蟠結梗道公操矛鼓譟出入營壘間斬首千百計而身中一矢還命守太平後四年遂卒卒時年三十有九夫人邵氏公與僞漢戰時一子方三歲夫人以牲酒祭家廟會家人泣曰今城且破吾夫忠義人必以身死之吾夫死吾必不獨生然不可使花氏無後嬰兒在若等善撫育之聞公就禽夫人赴水死年甫三十有五侍兒孫氏瘞夫人屍遂抱兒以行僞漢軍擣之至九江軍中惡養小兒孫氏以兒授漁家屬之曰此兒良宜善視之是年冬王師伐僞漢僞敗孫氏至漁家視兒在瞓漁人出竊負以走夜宿陶穴中天曙脫簪僦舟渡江遇漢潰軍奪舟棄江中孫氏抱兒遇斷木浮至附之入葦洲採蓮實哺兒七日不死夜半聞人語聲呼之逢老父號雷老告之故與其俱行明年辛丑春二月達上所孫氏泣抱兒拜上上亦泣寘兒於膝曰此將種也賜雷老衣遺之復其徭已而令人追之忽不見兒

八歲侍皇太子就學年十三授虎賁右衛副千戶後七年拜今官卽煒也煒於洪武丁巳偕孫氏至太平奉夫人骸骨歸乃束草像公以二月己未合葬上元縣南五十里之水橋嗚呼觀公之死賊與妻妾之報公可以知公之爲人矣天不殄其後豈不宜哉銘曰

雲雷遘屯區宇分篤生真人鎮乾坤騎龍鞭霆下天門前翼後衛蔚若雲誰其最雄花將軍力驅智駕敵萬人蹂躪羣盜猶麝麝大刀長戟屬橐鞬左麾右刺流電奔紺衣縕弁貔虎屯駐馬飲江江水渾吳楚之域殺氣昏手挽天河洗妖氛軍聲隆然若雷震遭者膽落兩足蹲元戎開府大江濱腰佩兵符威令尊控制上游爲國藩僞漢恃力不圖存建旗揚帆事鎧鼓艨艟蔽江躡鉤援槌牛享士士氣伸馳馬督戰寧顧身賊焰熾若烈火焚大戰三日勢愈殷單騎赴之齒齧齦怒髮上指目吐烟汝賊兇頑犬與豚願醢汝肉一口吞賊慙耳塞不忍聞至死不屈酬國恩飄然乘雲叩帝闕請爲厲鬼扼賊元賊當殛死洗厥冤天子下詔褒忠勳東丘立侯貲九泉孤兒保育寵便蕃不墜宗祀天所敦生爲烈士死明神神靈在天光煒煒嗟爾來觀萬子孫繼忠思孝慎勿謾弗信請考太史文

故嘉興知府呂府君墓碑

元至正之季民反處州爲盜轉掠而東陷永康藝諸縣繹騷弗寧永康太平里大族呂君文燧散家資數千萬與弟文燁合謀募里壯強子弟得三千人將之與盜屢戰盜敗走復其邑斬獲甚衆呂氏之聲聞東南朝廷三授以官皆辭不受用事者聽讒殺其弟卒不敢怒而爲之盡力大臣義之承制表其閭而復其

家婺之巨室細民幸不遇盜者悉歸功呂氏是時永康有呂氏隱若巨鎮焉今上皇帝既克婺君族人籍兵甲以君名詣轅門降上大喜特立永康翼以君爲左副元帥兼知縣事時君以事留杭未返命其弟文烜攝之君還復召爲庸田司經歷改中書省管勾江西行省都事權知廬州府至官三月浙西平更授嘉興知府累階某大夫松江民作亂襲嘉興君覩知之走使者告李曹公文忠賊始據城曹公兵卽至遂就擒諸將欲屠城君爭曰據城者賊也城中民何罪釋不屠民德之滿三載入朝奉詔持節諭閩婆國洪武三年十一月次興化有疾十六日卒於驛舍四年十二月某日歸葬東陽縣興賢西丘之原年五十四君有德於鄉鄉人聞其卒皆哭泣相弔喪歸耄倪迎拜於道數十里不絕卒之明年嘉興佐貳以下坐鹽法死者數千人有司以君嘗署名公牘例籍其家上特詔歸之曰吾知呂文燧誠信人必不圖姦利且歿於使事可念也時呂氏家逮繫縣獄鄉人哀之如親戚及詔歸其家乃皆舉手相賀君子由是知君之德及人者深也君字用明文燧其名也其先有諱玖者自河南來遷玖玄孫浩上書宋孝宗朝脫父兄於詔獄孝宗崩行喪三年浩弟源以行義旌門皆有惠於閭里源玄孫鑰仕元爲永康尹君曾祖父也祖父汲父機母某氏初君之大父嘗脩上世所立義田以食族人置學以教子弟至君踵其志卒成之君爲人如儒夫至其奮發於義不顧利害必達乃止蓋其所從來遠矣君娶戚氏三子曰堂壻培培後季父文爌六女其三人適同邑胡海金華戚誠道東陽俞文璉餘未行孫男二人堂旣葬君乃謀於弟曰先子之友固多其同朝仕而知先子者唯太史宋公太史嘗銘天下賢公卿大夫其言可傳信苟以墓上銘爲請必不忍

辭乃以君族弟熒狀來請君之政蓋多可稱余不能知然其最大者活永康嘉興之民書其大使人可推知其餘也銘曰

人之所爭智名勇功或易於始而艱其終呂君之興秉義孔偉散金聚兵以彌狐鼠既克有成不居其名錫命者三辭而弗承匪徒辭之以俟神聖黃鉞臨城解甲請命左綰將符右珮縣章季也攝之於君有光起司庸田亦佐方嶽章服有儀蔚爲邦伯自廬而吳千里是綏相其良姦以撫以誅憲氓跳踉弄兵陷郡陰檄王師擒斬以徇將怒謂君亂民可屠君爭不從萬家獲甦不躋於崇而淪於遐吏操深文幾隕厥家家之再完由天子明天子不遺由君之誠君德甚多鄉人是思載德登碑於以悼之

贈中順大夫鎮江知府徐公墓碑

皇上卽位之十年詔曰光祿卿徐興祖慎事小心在朕左右二十有五年未嘗有過非其祖父之教曷以致斯其準恆制寵贈之官以勸奉職者於是吏部承詔贈其大父餘慶中順大夫應天府丞父景福中順大夫鎮江知府祖妣朱氏贈德人妣高氏贈淑人興祖旣祇奉制書告於墓下復謂余曰吾祖父世有醇德祖之事稍遠弗能悉知知而悉者惟吾父而已吾父之德吾知之吾子雖知之弗悉也至於吾孫又不若吾子之知則遂忘矣苟不託於文辭何以示後之人使知所自敢以累執事焉余與興祖同朝甚久不獲辭徐氏世爲建康人國初易建康爲應天府今爲應天之江寧人公諱景福字某諱餘慶之子諱守禮之孫平居愿貌寡言事親先事揣意取其歡欣兄眉壽析產出居朝夕往省問其缺乏及所好而饋進之

並市肆備百物以通時之有無不過求銖兩息遇人不問長少卑躬悅色慇篤誠信出言惟恐傷之一揖垂首幾欲及膝久之然後起與俗無怨聞喧冒聲輒引避人告以求利則曰苟足可矣非敢求也或尤其太同則曰誠以待物同非所知也由是里閭咸稱之爲善士公旣以此自治生子亦以是教之年若干以某年某月日卒某年月日葬於聚寶山府丞墓側妻卽淑人高氏祔焉高氏柔嘉有則年若干以某年月日卒子男三人長紹祖次卽興祖次敬祖興祖淳篤遜謹由尙食局副使四遷至今官階中順大夫爲上所信任賜以第宅土田而孫男五人欽鑑鈞仁義皆謹飭習禮欽復擢爲從仕郎掌醢署丞曾孫男女又十餘人君子於是知公積善之報未已也嗚呼爲善者觀於徐公可以知勸矣乎銘曰

天博而穹厥聽孔聰善祥慝殃咸以類從孰嚚不知訾其幽遠棄不爲善其胤卒殄有察其然善集於身身或弗昌昌在後人懿惟徐公嗜善忘利豈必多言躬行於事純孝篤誠於父於兄小智私謀我則不能里譽間稱公誠善士不顯其身以遺厥子厥子如何冰潔璧溫玉食是司以奉聖君帝嘉舊勳俾長光祿金帶朱衣其儀甚肅殿門嚴嚴不敢顧瞻退食於家默無一談帝曰爾賢祖父善教錫以峻爵以勸忠孝迺贈徐公守彼鎮江徐公有父佐於鄉邦制書煌煌丹璽如日宰木祠垣憊然動色鄉隣歎咨始實弗知積善致斯胡寧不爲徐公有善子食其報人孰非公賢者是效

故翰林侍講學士中順大夫知制誥同修國史危公新墓碑銘

嗚呼翰林侍講學士中順大夫知制誥同修國史危公享年七十以洪武五年春正月二十三日卒於和

州舍山縣之寓舍。其年二月十五日，權厝於舍山。某年月日始遷葬金溪白馬鄉高橋之原。其子臤反於襄十年春正月，蒙恩致政東歸。私念公相知特深，在前朝時欲引薦入史館，及今待罪禁林，實與公爲同僚，相得甚驩。於是評駡羣行而勒文於碑。其文曰：公諱素，字太樸，姓危氏。危本姬姓，周武王庶子某生而手中有文曰危，因賜姓危氏。封於新，其後居光州晉永嘉中，建州刺史京遷建昌之南城。唐黃巢之亂，全諷與其弟仔倡，赤手起兵，擒巢黨柳彥章於象牙潭，擢撫州刺史，累官金紫光祿大夫檢校太傅，封南庭郡王。南庭之後，復遷撫之金溪白馬鄉，譜圖亡，竟逸其名。南庭十五世孫宋景定三年進士通直郎知臨安府仁和縣事，元累贈中奉大夫江浙等處行中書省參知政事護軍，追封汝南郡公。炎震公之曾祖父也，累贈資善大夫河南等處行中書省左丞上護軍，追封臨川郡公。龍友公之大父也，累贈榮祿大夫江西等處行中書省平章政事柱國，追封豫國公。永吉公之父也，曾祖妣王氏，彭氏，妣劉氏，皆封郡夫人。郡之名如其夫母劉氏、黃氏並封豫國夫人。公自至正元年用大臣交薦，入經筵爲檢討，公年已四十一矣。五年改承事郎國子助教，七年除應奉翰林文字同知制誥，兼國史院編修官，未上轉宣文閣授經郎，兼經筵譯文官，階文林郎。明年復入翰林爲應奉，十一年遷儒林郎太常博士，十三年轉奉訓大夫國子監丞，擢兵部員外郎。十五年陞奉議大夫禮部郎中，拜朝散大夫監察御史，遷工部侍郎。明年轉朝請大夫大司農丞。又明年陞中奉大夫大司農少卿，復入禮部爲尚書。十八年參議中書省事，兼經筵官。次年進通

奉大夫御史臺治書侍御史二十年拜通奉大夫中書參知政事同知經筵事提調四方獻言詳定使司後四年階陞資政大夫俄除翰林學士承旨榮祿大夫知制誥兼修國史李羅帖木兒入相出爲嶺北等處行中書省左丞明年棄官居房山二十八年閏七月元順帝北奔淮王帖木兒不花監國承制復起爲翰林學士承旨上章控辭已而元亡迨入國朝召至南京洪武二年授以今官三年兼弘文館學士是年冬監察御史王著等劾公亡國之臣不宜用公坐免詔出居和州閱再歲而卒公生四歲其大父卽師公讀書大父本黃氏子來繼於危知公能亢危氏宗督厲之尤切年十五卽通五經大旨據坐爲人師與同郡葛君將曾君堅黃君暉萬君元哲更相策警窮日夜不休復徒步走臨川吳文正公澄清江范文白公棹之門質而正之二公皆折行輩與之爲禮吳公至恨相見之晚凡所著書多與公參訂之虞文靖公集孫先生轍名德俱尊其遇之一如吳公由是公之名震動江右間出游金陵或以其文示南臺中丞張文穆公起嚴張公以狀元爲顯官少所稱許獨推服公曰危君爲狀元庶幾相當老夫有愧色矣張公入朝遂挾公以行達官貴人慕公聲華爭欲出其門下更相論薦惟恐失之公之檢討經筵也經筵一月進講者三講文皆屬公手公嘗敷繹民惟邦本之言以進典領臣惡其峭直難之公曰經筵之職所以格君心反不以民之疾苦告邪縱加罪罪在操觚者素請當之卒以進講順帝大悅詔賜經筵官酒公不飲復賜馬渢一革囊金織文幣人一端皆有副已而有詔下中書發錢粟千萬賑河南永平民萬口咸曰活我者經筵官也公復移書執政請修宋遼金三史乘傳行宋兩都訪摭闕遺書成公之力居多順帝知公問學

淵深特命註爾雅較君臣政要公悉心而爲之不數月而成及進賜金若干公辭曰臣職也何勞而受賜不敢奉詔尋有宮人之賜公復辭曰臣有糟糠之妻在大江之南無所用之亦不受其助教成均也六館生擇所疑羣揖難公公片言折之悅而去分監上京輶餐錢建監門葺齋舍勒開國以來分教師之名於石尙書王某致政居蔚州構暖泉書院請額於朝他監官以地無先賢故事不從公聽其立師以訓士子順帝以公善筆劄詔書釋氏書公辭曰臣官胄監以教化民彝爲職外教之典不宜書無已遷他官乃可耳遂止其授經宮學也受業生皆貴戚大臣子橫肆不率度公創教條置帳歷日書其勤惰月會而賞罰之皆畏服不敢犯其復應奉翰林也會修后妃功臣傳事多亡逸無據公買餳餅饋宦寺戚里歷歷叩之復參覆得實乃始筆之卒爲全史其在太常也請親祀南郊築北郊以斥合祭之非謹謚法嚴祀典以祛謬妄時翰林承旨張公翥爲博士禮文有闕者同補正之人稱爲雙璧其爲國子監丞也捐束脩鋟小學書及夏小正經傳考於梓以惠學者其居兵部也奉詔墾田於雄霸二州相地受畧雍除荆棘闢田幾萬畝使民有道民德之其陞禮部也與許文正公衡之孫克學俱贊皇太子受玉冊故事皇太子謁廟用牲體百官以朝服賀於東宮公謂克學曰儻有違禮人惟責吾二人盍正之遂徹牲醴而以便服賀其擢御史也知無不言御史觀音保等四人以諫死英宗朝公請錄其後官之四川行省平章政事囊加歹天歷初舉兵欲翊戴明宗燕帖木兒伯顏等構殺之公力爲雪其冤容城民魏敬益買田千畝後見鬻田者二十家不能自生以田券還之公請旌其門以敦廉讓其在工部也順帝欲以蒙古書譯釋氏三藏經下

部刊行。公以無益諫罷之。執政居第與燒飯橋近。有司希其意。欲鑿石易橋。公諍止之。降香祀嶽瀆。故用金十兩爲香函。吏利金以銅半雜之。或造銅函易金。公廉其狀。皆執論誅之。淮南兵亂。公奉旨廉問其故。會維揚京口歲饑。民欲相食。公便宜諭守臣。發楮幣數萬定賑之所。全活者甚衆。上淮西宣慰司。余闕捍賊功狀。請陞其官秩。復請立宋徐節孝書院於淮安。其官大司農也。分治京南保定之境。幾無曠土。時海輸不至。軍國多仰焉。新城民田氏。聽後妻讒。殺其子。公憤之。職既不可治。乃爲文祭其子。民悔愧。後妻逃去。人搖手相戒。不用婦言。其長禮部也。時亂將亟。公憂之。每陳得失無隱。丞相賀惟一曰。君向寡言。今又何多也。公曰。時危恩重。情豈能默默。吾不敢畏丞相。但畏後世史官耳。其參議中書也。論天下事。以擇將帥舉賢才爲本。請專任甘肅行省平章定住。總西方兵。勿遣其迎帝師。悞軍事。用樞密副使普顏不花爲中書參政。經略江南。以也先帖木兒黃常爲禮部尚書。頒歷安南。立兵農宣撫使司。以安畿內任賢守令。以撫流竄之民。順帝欲以公兼兵農宣撫使。公以疎遠辭。且諫曰。今日之事。宜臥薪嘗膽。以圖中興可也。公言雖愈加切。時不能盡用。舊制銓曹有行止科。吏主之。日具內外官十名上中書。中書籍以遷擢。其後吏怠不爲意。仕者淹滯。有待選十餘年者。公責吏日具五名。五日一上中書。吏樂易集。各思奉職。而久滯者獲伸。高原富民劉強。通其子婦。婦訴官。達刑部。吏受賄。欲變其獄。以俟赦。公以事關倫理。趣如法論之。其轉侍御史也。亂兵殺易州達魯花赤。公請假守令以制兵之權。會中書左丞成遵而下。以賊得罪。獨賀丞相斡欒平章與公不與。皇太子書。澄清忠義。清白傳家八字。以褒賜之。其參知政事也。刑部尚書朱列

圖兼興和路總管與守將有隙。守將誣其欲私發官囷糧。廷議杖踰百免其官。公驗無發封狀。釋不問。都事倪晦與劉哈刺不花同官。丞相太不花莫府數以公事忿爭。劉怒欲中晦。陰結監察御史劉君楚。俾擠之。會晦至燕都。囊故人所寄買馬白金。君楚攢其囊得金。下晦獄。令自伏爲贓。狀上中書。公疑亟爲白出之。馬德守德州。俘所獲南軍千戶楊甲至都。將斬之。公召問狀。乃淮安世襲千戶。戰敗陷濟南。羣盜中陳柔俾詣德軍饋物。德械送之。非賊也。公白宰相釋之。楊感泣曰。參政生我枯骨中。惠大無以報。然參政長者。爲公法釋我。我不敢私謝。期以忠義報可也。卒與逆臣李羅帖木兒戰死之。太醫院經歷徐某藏盜賊。盜敗。徐就鞫案已具。要官庇。徐屬公從末減。使三返。公竟不許。嶺北行省參政董復初素有廉名。同省臣飛書言其在稱海宣慰司時取官中米千石。公疑其事。遣使覈覆之。果得其誣。李羅帖木兒、廓擴帖木爾俱以平章總兵河南。漸生釁端。公謂御史大夫普化曰。養虎者欲其不相搏噬。則別其牢。今欲二人無鬪。莫若加其職而分地處之。用李羅帖木兒爲丞相治四川。以廓擴帖木爾爲丞相治河南。各責其成功可也。大夫曷不爲上言之。普化如公言。順帝及皇太子咸以爲然。會丞相搠思監喪妻不出。事中寢。初江南經略使普顏不花。李國鳳請封徽國朱文公爲齊國公。以龜山楊公豫章羅公延平李公西山真公九峯蔡公從祀於孔子廟廷。公爲御史時。亦請封謚劉蕡。事上中書。皆寢不報。至是公皆舉行。復爲文以少牢躬祭墳墓。禮部員外郎姜碩使僞漢陳友諒不屈而死。公爲奏官其子京幾。歉國用不足。公奉旨以錢幣誥勅募民入粟。公以義諭民。聞者感動。荷負來輸者填道。至有不願給直者。上都宮殿火。順帝勅重建大

安睿思二閣公上書諫曰苟以二閣爲祖宗所建四海九州獨非祖宗故物乎會皇太子大臣亦以爲言遂罷其役其承旨翰林也翰林修史有司日奉餐錢方爲之否則斂手而坐公謂同列曰吾等以史爲職且祿已厚矣奚俟餐錢而後爲邪因次第修之其以左丞居嶺北也和寧爲太祖肇基之地而無圖志可徵公請於朝作和寧志先是夏侯尙玄嘗伏闕上疏言鄭王某之冤公高其義補其子爲宣使時埜速達兒爲胤平章挾私憾殺右丞答里麻巴公曰是尙可以仕邪不去禍且及卽上章辨答里麻巴無罪辭官去居房山臥不起將相重臣皆以書請不聽丞相史列門來問計公曰撫軍院誤國至斯不可救矣亟請河南王廓擴帖木爾總兵以衛畿甸而固守之當時事勢已不可爲及再任翰林僅一日而大兵入燕公曰國家遇我至矣國亡吾敢不死趨所居報恩寺脫帽并傍兩手據井口俯身將就沈寺僧大梓與番陽徐彥禮大呼曰公毋死公毋死公不食祿四年矣非居位比且國史非公莫知公死是死國之史也力挽起之已而兵入府藏垂及史庫公言於鎮撫吳勉輦而出之由是累朝實錄無遺闕者公之力也其入國朝也皇上嘗訪以元興亡之故甚見禮重俾之侍講禁林宋穆陵顱骨爲楊璉真珈所發後入宣政院西番僧相傳授爲祭器公言於上索取瘞之聚寶山時公春秋已高雅志亦不復仕矣公厚重深中有容寡言笑聞人詆毀如不知與人交有禮雖貴顯恆若貧賤時平生好薦賢先後所引若翰林學士劉君獻待制黃君磾等七十餘人至通顯者甚衆累持文衡考試多士人服其公樂善好施若有督之者凡事有關於名教可以勵風俗者必爲之乃已居官清慎節儉遇凶歲輒疏食不御酒食倉吏進祿米贏七斗時斗

可易白金五兩。公命歸之官。奉勅書徽政院使禿滿達兒神道碑。其從子以白金五十兩爲壽。公卻之曰。國體當爾。居中書。凡請文來謝者。皆不受。故人妻子不能衣食者。厚賙而生之。或嘗請仕。公曰。賢才未進。吾敢私爾乎。能以德報怨。參政燕人杜翹。以公南士欲構公罪。翹死金陵。公爲文祭之。公博學善文辭。至正中。獨以文鳴天下。凡朝廷制作。皆自公出。四方欲顯白先德者。皆造公門。尤精於書。得片楮隻字者。寶祕以爲榮。有文集五十篇。奏議二卷。宋史稿五十卷。元史稿若干篇。藏於家。公娶舒氏。先三十年卒。再娶趙氏。先十一日卒。俱封楚國夫人。子男子二人。幼中至正二十年進士第。累官承直郎。大都路同知蘄州事。今爲安慶府儒學教授。游登仕郎。大都路儒學提舉。亦前年卒。女六人。一適同邑曾侁。堅之子也。餘皆天孫二人。長太平天。次德童。公未仕時。館授貴谿張氏。張思伐杏樹。以闢家塾。有鬼夜叩寢門。告公曰。吾杏之精也。主人將伐。願參政生之。公卽遣張力解而止。鬼致白金壺爲謝。公辭。及公爲參政。嘗以滿溢爲懼。後陞左丞。遂快快不樂云。嗚呼。天之於人。不能以俱全也久矣。或授之才而不假以位。或畀以位而不畀以時。此奇才偉德之士。常困而不施。而生民所以鮮蒙其休澤也。惟公以淵深之學。精純之文。嘗都顯要之地位。海內仰之。如祥雲景星。亦可謂有得於天矣。而逢時亂亡。不獲大展以死。豈不可哀乎。雖然觀其所自著者。固足以不朽矣。銘曰。

二氣孕精。至文迺生。凝爲川嶽。煥爲日星。天地之文。因象以示。象默無言。非人莫著。往古百代。作者孔多。迄今有聞。其能幾何。元興朔方。氣淳而龐。俊烈宏謨。震盪萬邦。積盛而彰。實在君子。維八十年。其績甚偉。

卓茲危公起大江西。奧學醇辭。孰能與齊。在至正初。交薦而陞。敷繹聖經。以牖帝明。中原薦饑。黎首告病。公跪而言。民爲國命。同列畏聞。吐舌改容。當丘褒嗟。曰維汝功。往師成均。疇瞽有相。化其荒嚚。趨厥禮讓。執蠶執蕎。弗除弗薅。白之擢之。予之錫之。剔之殛之。抉而植之。彼何不思。多言是嘗。曰匪其然。吾畏後世。南風泱泱。耆老淪亡。屹如丘山。以鎮四方。疆土日蹙。孰不震動。謂尚有公。特以無恐。權奸肆威。盜秉國鈞。畏公有言。出爲藩臣。政亂無章。倚勢相戮。公駭而吁。吾胡可祿。微服宵趨。房山是居。庶士遑遑。如涉失桴。天兵北征。驅雷走霆。有耳莫掩。燕社已傾。公曰國亡。吾曷不死。公忍不死。以存國史。大明方隆。多士景從。有詔任公侍講禁中。昔豈不仕。弗獲行道。時之可爲。公則旣老。維古賢士立德樹勳。苟有弗施。著之斯文。公文之純。太音玄酒。道則在茲。爵祿何有。孰高爲山。孰深爲淵。文之有傳。終古昭宣。

元故祕書少監揭君墓碑

有元盛時。荆楚之士。以文章名天下者。曰虞文靖公集。歐陽文公玄。范文白公樞。揭文安公儀。斯海內咸以姓稱之。而不敢名。其後三公皆死無繼者。獨文安冢子諱泓。君以文學仕順帝時。至國亡而後終。人謂揭氏有後。君字伯防。少敦樸苦學。同舍諸生已成誦。出嬉遨。君獨坐諷不休。夜爇薪以繼。必至精熟乃已。年十八。盡通六經大義。肄舉子業。試不台有司。旣棄去。取諸子百氏書窮研之。攻古文辭。侍父入燕都。補太學生。端方有威儀。六館士敬憚之。或譁笑方殷。聞君履聲輒止。是時虞公及歐陽公皆在朝廷。交稱君

美以爲文安慶至正口年文安薨天子錫金錢百僚皆致賄榦人勸君輸貨縣官而給鹽淮安可獲利數倍且無遺路處君哭不從曰汝敢玷先君之喪乎至家援禮制儀戚易兩至服闋以蔭補祕書郎階承務郎遷翰林國史院編脩官轉太常博士再入翰林爲修撰仍兼國史編修階三轉至奉議大夫代祀北嶽北鎮還拜江南行臺監察御史未上留爲禮部員外郎階朝列大夫十八年奉詔諭江西至七閩會僞漢陳友諒陷江西不得往改僉江西湖東道肅政廉訪司事加朝散大夫治建寧旣而友諒兵寇杉關下邵武據延平建寧受圍大軍退保福州城中吏民相繼出奔惟經略使普顏不花尙在君詣與之謀經略聞君至迎曰僉事猶未行耶君憤曰經略何爲發此言今盜賊圍孤城正吾與經略致死時也吾死將與此城俱顧獨走欲安之乎經略起問計君爲之畫策經略驩曰吾志決矣卽當如君言部散卒得千人命建寧總管阮德柔將之出戰不利民大驚君集衆告以禍福謂并力禦賊則妻子可生緩將爲俘擄語甚切民感泣請各自效無老少悉乘城固守君往來撫勞之分壯者千人助德柔戰屢捷勢稍張城外有山曰黃華高出城上君恐賊窺見虛實作層樓蔽之命守者鍛鐵爲長鉤廣儲水樓下以俟衆不知所爲及賊據山以火攻樓卽以長鉤曳之隨灌以水火尋熄復預積濕薪枯藪城下城穿隧以入燎烟於隧熏之死者甚衆賊揚言攻城西君察其旗亂而氣怠命備城東已而果攻城東知有備驚駭而退是時內外相持逾十旬樵蘇道絕徹民居以炊經略憂以問君君曰士氣在乎作之爾且直壯曲老吾以王師討賊何憂不勝乃槌牛釀酒勞將士以義激之皆踴躍請戰空一城鼓譟助之聲如雷霆賊衆數萬逆戰君戎服出

陣後督諸將盡力俄矢石亂下或請少避其鋒君叱曰破賊在今日敢言退者斬於是士卒殊死鬪自寅至午焚其三柵乘勝奔之是日福州援兵繼至城敗走復延平等三州獲勝兵千餘人咸欲繫獄論其叛逆罪君曰大盜未殄脅從者可勝誅耶誅桀黠者數人悉縱之耕及諸將上功於朝被褒擢君未嘗出口或爲君冤君曰吾職耳可徼功乎改江西行省郎中未赴以工部郎中召時淮浙亂道不通留家四明之慈溪挾子樞浮海而北過黑水抵鐵山卒遇倭寇同行多被害君脫走趨遼東轉之山東制下陞祕書少監階中順大夫而齊國忠襄察罕帖木兒在洛遣使迓君君赴洛留歲餘承制授刑部侍郎不就二十八年踰太行至燕都未久大明兵圍城七日十八日順帝宵遁明日君覺之遑遑北走樞失君所在號哭而追及於海子橋君罵曰吾死職義也爾來欲何爲奮然行弗顧樞泣抱持賓客故人亦稍至遂強挽君歸環立守之君擁衾臥不食樞叩頭流血請所親厚者交進慰解乃起食一餐八月二日兵入燕凡仕者例從南京君至稱疾弗仕踰年反慈溪洪武六年二月八日卒於寓舍年七十四月一日權厝舍西香蘇山之原以某年月日葬某地君事繼母以孝聞撫庶弟有恩六主文衡所得多奇士交友皆當世名人爲文敦深簡質有父風務關倫教不爲浮豔語集毀於兵存者若干卷藏於家君自視歛然接人和而有禮寡言峻行未嘗有矜大之色雖家人不見其疾言厲氣平居非疾病必冠帶爲私書皆端謹可觀初君之曾祖贈嘉議大夫禮部尚書上輕車都尉追封豫章郡侯惟聰祖贈中奉大夫江西等處行中書省參知政事護軍追封豫章郡公謚貞文文成世居豐城皆以厚德稱至文安遂以布衣致位翰林侍講學士中順

大夫知制誥同修國史同知經筵事追封豫章郡公而推恩及於二代郡侯之配黃氏何氏郡公之嬪黃氏文安之室李氏程氏皆封豫章郡夫人君起其後又能世其家有聞於時而君之子樞樂復好學問不失儒行當可繼於君嗚呼爵祿之繼可幸致也而繼其文學爲難文學可勉而修也而繼其道德爲難若君者可謂兼之矣君娶曾吳易三氏曾先卒吳易二氏皆封靖安郡君子男四人女丑夭其二卽樞樂三女適盛伯剛某君之居慈溪與今晉王傅桂君彥良交君卒彥良持樞狀來速銘銘曰

自古有國貴惟世臣匪爵之仍有德有文溯元百年中有揭氏位雖弗崇其德可持揭氏之先豈無侯王盛莫與紀靡久卒亡維文安公敦厚凝確際時休明典帝制作德尊望隆震撼四方執造化機闡陰闢陽人止其身公又有子緝其休聲克闢克似豈惟文辭亦有事功建略南藩剪屠姦兇仗義爲城奮作士氣章甫申申復地千里褒寵之加非我敢知勞烈雖多乃職之宜邦國殄喪吾能獨存奉身以歸敢汚先君生旣有聞歿則有承凡時之人其誰與京天匪私君以彰世德德著穹碑來者咸式

故筠西吳府君墓碑

洪武二年冬十月二十有五日筠西府君以一疾不起聞壽年雖八十有八其州里之人更相弔哭以爲義士亡矣吾屬將何所依賴十數里中聲嗚嗚不絕四年春正月六日葬於孝義里戈溪之源其孫鑑以濂知府君最深請張君辰作右功世取文刻碑文曰府君字長卿諱宗元號筠西其氏曰吳吳出泰伯苗裔初遷會稽之山陰唐大中間有諱翥者以學行聞門人私謚文簡先生先生遠孫少邦咸通初復遷諸

暨開化鄉之峽上少邦九世孫泗宋崇寧中復由峽上遷孝義里世有顯人其詳具見譜圖記曾祖蘭祖元祐父謙母斯氏府君馮出也孕二十四月而生幼發智如成人早喪父事母夫人甚恭黎明至寢所候起居躬進膳羞必待竟食乃退母常戒之曰我有媵侍自足備給使勿勞苦我兒也府君頓首謝及母有疾府君遑遑不自寧夜參半泣禱上下神祇籲以身代久弗驗府君心益苦一夕母夢白衣人謂曰汝壽止於斯今以汝子之孝特延一紀疾果瘳忽都魯忽公宣慰浙東聞君之孝辟爲奏差受事僅數月嘆曰我母年已耄苟力由以爲養不翅足矣何以仕爲竟拂衣而歸日在親側視其顏色爲進退歷十二年母以高壽終府君號慟幾致隕絕服闋雖已久但語及之輒哽咽流涕如新喪見者憫之府君自念父母歿唯教子孫毋析居乃可以繼先志聞浦陽鄭順卿家十世同爨特往謁焉順卿示以家範數千言府君如獲寶璐而歸力遵行之十有餘年家政蔚然可觀戶庭之間穆如春風人無間言者和氣所感有犬病足其子啞食哺之犬得不死文人競爲詩歌美之府君益堅爲善之志製家教一篇誨飭剗切洪纖無不及而惠利鄰族之事居多召子孫示之曰天之畀於吾者厚矣脫有餘財可坐視顛連而弗之卹乎吾就地之日近故惓惓爲爾輩言之府君晚年耳益聰目益明健步如強年人及見玄孫之生士君子咸集府君危坐中堂一子康髮盡白帥諸孫曾鴈驚行以進次第舉觴爲壽府君抱玄孫寘膝上銜杯盡歡蒼顏酡暎望之者謂爲神仙中人繪史遂爲高玄聚慶圖以傳後三年府君遘奇疾陽道閉塞不復能小遺醫者云病在陰氣絕藥不能及法當喻而通之其孫曰鉅者遽如醫言僅得汚血一勺終不治府君度疾不可

爲呼家人與訣以義居不分爲屬其耿耿猶前志云府君娶陳錢二氏皆先卒繼楊氏後府君亦卒子男子一長庸先卒次卽康子女子一適同里斯文孫男四鑑銓鉅孫女一花亭黃鏞其壻也曾孫男十源灑濤海汝灝治瀨渡淇曾孫女二在室玄孫男櫟梓桷植府君性恬沖與物亡忤貌熙熙常如春未嘗少見憂戚之容頗嗜音樂自造短簫長可六七寸遇風日清美輒箕踞而吹之聲振林木而胸中之自信者一假是以洩之故當時之賢者多樂與之遊且惜其不沾一命之祿以展所蘊終無以暴白於世然而生受備物之養歿則期功緼麻千指就位而祭雖古之封君亦不過此尙奚憾哉濂也不敏頗嘗獲拜床下與聞緒論及東出逃難又蒙授館致餼如忘年交府君今不可覩矣俯仰今古惡得無情乎於是掇其大者而製銘曰

有夫之羸如發行之眞如家聞之馨如條教惟程孰得而京如影端如形孰得而傾如蟄如繩如彙如烝如將歷世而弘如

